



رؤية عالمية بهوية وطنية

A Global Vision of National Identity

0

المسرحية الاجتماعية الكوميدية الهادفة

خربطيش

تأليف:

طالب الدوس

جوال: 77118882/50168899 - ص.ب: 64162 - البريد الإلكتروني: Ali_almohammadi@orangemediallc.com

رقم رخصة وزارة الثقافة: (2018-113-000907) - Info@orangemediallc.com - www.orangemediallc.com

ملخص مسرحية خربطيشن

ليس هناك أقسى من أن تقسو على نفسك وتحملها فوق طاقتها ، بينما الخالق بجلالته وقدره ، " لا يُكَلِّفُ اللَّهُ نَفْسًا إِلَّا وُسْعَهَا " ، كثير منا يعيش في سجون اجتماعية ، دخلها بمحض إرادته ، وعندما يكون السجين نفسه هو القاضي ، عندها ندرك أننا نعيش في خلل وفوضى نسميها بالمصطلح العامي "خربطه" ولأن الفوضى مصطلحات تتحكم فيها الأقدار والقوى الأخرى رأيت أن الكلمة المستحدثة والمتداولة بين الجيل الجديد "خربطيشن" أفضل لأنها أوحى لي بالخربشة وهو فعل يقوم به الشخص نفسه ، ليفسد كل ما نظمه وخطه قبل أن يقرر الخربشة.

تعالج "خربطيشن" ، فكرة السعادة المبينة على المظاهر الكاذبة ، والتي تهدم بيوت أحيانا قبل وضع الأسس ، السعادة الزائفة والتباهي أمام الناس بمظهر سرايبي ، بالإضافة للإسراف والبدخ ، في مجمل تفاصيل حياتنا اليومية ، نضطر إلى ركوب سيارات فخمة باهظة الثمن من أجل الناس ، نسافر إلى دول مكلفة ، نشترى أثاث مكلف ، ولو بحثنا في كل تفاصيل حياتنا ورغباتنا ، فنجد خلفها رغبة التباهي من أجل أن نظهر أمام الناس بمستوى رفيع ، أننا عندما نعيش في مجتمع يحقق للمواطن الرخاء والحياة الكريمة ، البعض تخونه تقديراته ، ولا نحمي أنفسنا بأن نتصرف حسب مقدرتنا وميزانيتنا أو ما نملكه ، إنما تصرفاتنا وميزانيات مباهتنا تقدرها الغيرة والرغبة في التقليد ، والتفوق الشكلي لنكون الأفضل على من سبقنا .

نختصر الحكاية من خلال "مبارك" الذي أحب فتاة وأراد الزواج بها رافضاً حكمة أبيه وخبرته بأن لا يبدأ حياته بالديون ويتعد عن المظاهر الكاذبة، لكن "مبارك" يصر على الزواج من الفتاة التي أحبها ويفعل المستحيل لخطبتها من أبيها المادي، وفعلاً يحصل "مبارك" على ما يريد، وخلال تخطيطه وترتيبه لأموال العرس مع زوجة المستقبل التي ستتزوج صديقتها رجل ثري، وهنا يبدأ سباق التحدي بين "مبارك" والرجل الثري، حتى يكشف مبارك أنه في دوامة وعاصفة لا نهاية لها .. يجد أن الطريق للأمام الذي كان يراه مضيئاً بتفاؤل وسعادة قد أصبح طريق مجهول ضيق مليء بالأشواك والمخاطر، بينما أصبح السير إلى الخلف مستحيل لأنه طريق ينتهي بعد أن نعبه ولن نقدر أن نسير فيه.

المؤلف: طالب الدوس

الفصل الاول/ المشهد الاول

المنظر: خشبة المسرح شبه فارغة هناك بعض الديكورات العشوائية والاكسسوارات التي توضح الاستعدادات والتجهيزات لعرض مسرحي.

- مع بداية فتح الستار وضاءة المسرح يظهر بعض الممثلين ماقبل بداية التدريبات "البروفات" المسرحية تدور بينهم حوارات جانبية، بعض الفنيين يقومون بتجهيز المسرح أو ادخال الديكورات البسيطة الصغيرة ، مساعد المخرج "سلمان" يقف في وسط المسرح يتحدث بالجوال.

سلمان : الو .. مبارك انت وينك؟.. شنو؟؟ مهب جاي البروفة؟.. ليش؟؟ .. تكفى مبارك مافي وقت والمخرج اليوم معصب حده .. اي عذر الله يهداك؟! .. مبارك .. تدري المخرج قايل .. مايبي أحد يتغيب عن البروفات .. والعذر الوحيد المقبول عنده هو الموت .. (بيأس) مبارك .. تعال انت وقوله هالكلام.

- نسمع صوت المخرج من خارج المسرح

ص. المخرج : جاهزين .. يلا .. يلا يا شباب

سلمان : (ينهي المكالمة بارتباك) خلاص يامبارك .. انا بقوله وانت كيفك معاه .

- الممثلون يأخذون اماكنهم ، بينما يدخل المخرج في حماس

المخرج : (يدخل الى المسرح) يلا شباب .. نبدأ المشهد.. اضاءة .. صوت .. جاهزين.

سلمان : اي استاذ كل شي جاهز .. بس .. بس ..

المخرج : (مقاطعا بضيق) بس شنو ياسلمان؟! .. سلمان ما ابي اسمع شي الحين .. اذا المشهد جاهز خلنا نشغل.

سلمان : (بتوتر) حاضر .. حاضر على امرك.

((المخرج يجلس في مكان مخصص له ، يفضل ان يكون في الصالة ، يبدأ فريق التمثيل في تقديم مشهد مسرحي من احدى المسرحيات العالمية بتمثيل المشهد بشكل مبالغ فيه أو مشهد غنائي حسب رؤية مخرج العرض، يضطر المخرج الى ايقاف البروفة)) .

المخرج : (بانفعال) اشتخبطون .. شتسون .. هذا مب تمثيل .. هذا كلام فاضي ..

(يظهر من بين الممثلين ممثل شاب "خلف" يضع مكياجاً لشخصية رجل كبير في السن)

- خلف : (يتحدث معلقا بسخرية وبهمس الى ممثل سوداني "عثمان") فاضي خلنا نعبيه (عثمان وخلف
يضحكان بخفيه)
- المخرج : (يضيق) خلاص خل هالمشهد بعدين نسويه ونعدله .. سووا المشهد اللي عقبه.
- خلف : مخرج .. المشهد الثاني فيه معنا مبارك ..
- المخرج : اي ادري .. (يلتفت متفحفا للممثلين) وين مبارك؟ .. (ينادي) سلمان
- سلمان : (يتقدم متوتر) كنت بقولك .. بس انت قلت .. ماتبي تسمع شي ..
- خلف : (بحماس وخبت) استاذ .. اشيل اللحية والمكياج واخذ دوره ؟
- المخرج : (يلتفت الى سلمان بانفعال) سلمان .. مبارك وين ؟
- خلف : (بارتباك) مبارك اتصل .. يقول عنده ظروف ومايقدر يجي اليوم.
- المخرج : (بعصبية) اشلون؟؟ .. اي ظروف واي خرابيط .. انا ماعندي اعتذارات .. انا قلت لكم من قبل
محد يعتذر عن البروفة لاي سبب .. والعذر اللي ممكن اقبله ان يجيب لي شهادة وفاته.
- سلمان : اي قلت له .. وهو قالي بيروح الطوارئ الحين يجيب لك شهادة وفاته ..
- خلف : قلتك يا استاذ انا جاهز وحافظ دوره .. اروح اشيل المكياج؟
- المخرج : (يصرخ بغضب) انتوا بتجننوني .. حرام عليك .. خلاص فقدت اعصابي ..
- ((يتقدم عثمان ممثل سوداني ، نحو المخرج مطمئنا))
- عثمان : فقدت اعصابك وين .. اتظمن هسه ندور لك عليها .. ولايهمك.
- ((عثمان يبحث حوله وعلى الارض ، بينما المخرج يزفر بغضب وهو يشد شعره قهرا))
- عثمان : (يسأل المخرج بسذاجة) طيب يامخرج .. ممكن تقول لنا مواصفات اعصابك علشان نلاقيها بسرعة.
- سلمان : (يتدخل ناها ومستوقفا عثمان) عثمان مهيب وقت غشمة الحين؟
- عثمان : منو اللي بيتكشمر .. (يسأل خلف) انا اتكشمرت ياخلف؟ .. (بجدية) سلمان .. انت عارف اني
زول جاد ومش بتاع كشمره
- خلف : (يعلق بسخرية مستظرفا وهو يضحك) كاش مره والا كاش رجل.
- ((الممثلون يضحكون ، يدخل مبارك شاب في متوسط العشرينات ومعه ورقة))
- مبارك : السلام عليكم ...

- المخرج :** وين ؟؟! .. توى الناس؟
- مبارك :** انت ماقلت ماتقبل احد يغيب عن البروفة الا يجييلي شهادة وفاته.. تفصل (يقدم له الورقة) هذي شهادتي وفاتي ..
- المخرج :** (ياخذ الورقة باستغراب وينظر لها) اشلون ؟؟! طلوعك شهادة وفاة وانت حي؟
- مبارك :** الدكتور فحص القلب لقاه مايدق وطلع لي شهادة وفاة .. قلبي واقف مايشغل
- خلف :** (يعلق ساخرا) يمكن البطارية تبي شارج.. شيكتوا البطارية ؟
- المخرج :** زين بقبل عذرك اليوم لانك متوفي .. باجر اول واحد تكون في البروفة.
- مبارك :** مخرج .. بيه اقرا الورقة عدل .. الدكتور كاتب لي وفاة لمدة ثلاث ايام .. يعني من اليوم لين عقب باجر انا متوفي.
- المخرج :** (ينظر للورقة ، ثم يعلن بضيق) خلاص مافي بروفة لمدة ثلاث ايام
- ((الممثلون يصيحون ويهللون بفرح ، يغادر المخرج المسرح))**
- عثمان :** مبارك .. الله يرحمك ويغفر لك .. كنت طيب .. ماقلتي لي وين العزا؟
- مبارك :** مافي عزا ياعثمان ..
- خلف :** على كيفك .. اشلون مافي عزا .. بيه نبي ناكل عيش ولحم .. من زمان ناظر احد يموت أو احد يعرس علشان اكل.
- سلمان :** اشلون عطوك شهادة وفاة وانت واقف قدامنا حي ترزق
- مبارك :** شنهى الحياة ياسلمان .. مهيب روح ؟ .. وين هالروح .. تقدر تقولي وين الروح؟
- سلمان :** (يفكر بحيرة) امممم ..
- مبارك :** اقولك .. الجسد هذا هيك .. ماكينة .. كل شي في الجسد له وظيفة .. بس حياتنا الحقيقية في الروح .. وارواحنا مب وجودة .. اللي تشوفه اجساد بس.
- سلمان :** مب فاهم .. يعني اشلون؟
- مبارك :** الروح نقية طاهرة .. اتدور على المثالية .. تسكن فيها الاخلاق والقيم .. هذي هي صفات الروح .. لانها هبة رب العباد .. بس الجسد ممكن يتلوث .. يتشوه.. والروح تنظفه وتجمله .. بس اذا كانت الروح ميتة .. شالي ينظفنا ويظهرنا .. ويحيينا .. علشان جذبه احنا اموات.

- عثمان : قصدك احنا هسه كلنا اموات احياء .. يعني مثل الزومبي
- خلف : ياسلام دام انتوا كلكم اموات .. بناكل عيش ولحم لين عشرين سنة جدام..
- مبارك : (يشير الى خلف) هذا واحد من الاموات الاحياء
- عثمان : ايوه .. هو فعلا من الاموات الاحياء .. زومبي .. شكله زومبي.
- ((يدخل راجو العامل الهندي يوزع الشاي والقهوة على الموجودين ، ويقترب من مبارك))
- راجو : (يقدم كوب القهوب له) مبارك .. هذا قهوة مال انت سكر زيادة
- مبارك : راجو .. روح جيب لي قهوة سادة .. من اليوم ورايح قهوتي سادة
- عثمان : لا الزول ده اليوم ماطبيعي .. قهوة سادة واموات .. حرام عليك يازول .. الدنيا كلها من حولنا سودة وسادة وحزن .. حتى المسلسلات العربية بتاعتنا حزن.. التلفزيون اللي عندي كله صار ماي من الدموع .. سويته حوض سمك.
- خلف : (يمسك مبارك ويمارجه وهو يمثل دور الاب المسن بمبالغة) اسمع ياولدي .. انا اكبر منك واعقل منك .. والدنيا ياما لعبت فينا ..
- (مبارك يركز باهتمام ويتفحص اسلوب وكلام خلف بأمل وهو يفكر في امر ما)
- خلف : (يتابع غير مهتما لنظرات مبارك) اي .. الدنيا ياولدي ياما لعبت فينا .. وانت توك شباب .. عيش حياتك وهموم اليوم بتنساها باجر..
- مبارك : (بأمل وحماس) انت .. اي انت ياخلف.. انت ..
- خلف : (بشخصيته العادية مستغريا) انا شنو .. اشفيني انا؟
- مبارك : (يمسكه كأنه يتوسل اليه) انت اللي بتحل مشكلتي ياخلف.
- خلف : (بتوتر لايفهم مبارك) انا .. اي مشكله .. وشنهي مشكلتك.
- ((يدخل عباس صاحب المخبز الايراني وهو يحمل طلبات الممثلين في كرتون صغير))
- عباس : مهياوه مع خبز حار...
- خلف : مشكلتي انا اللي انحلت .. جيت فيك وقت ياعباس .. ميت جوع..
- عباس : حاضرون .. (يتاوله الطلب) خذ خلف هذا طلبك مهياوه لحم ..
- سلمان : وانا طلبي وين ياعباس؟

- عباس : انت مانسيتك عبالك النسيتك .. مهياوة سمج مع دياي بالتونه..
- عثمان : (يسرع نحوه) عباس وين مهياوتي اللي بالخبز الطازج؟؟
- عباس : خبز مال عباس دايمًا طازج .. احسن اي طازج يطزجونه في العالم.
- ((يتجمع الممثلون حول عباس لآخذ طلباتهم ، بينما يسرع مبارك ويسحب خلف من بينهم))
- مبارك : (بتوسل وانكسار) تكفى ياخلف مالي غيرك يساعدي .. انت صديق عمري.
- خلف : (ينفر منه مبتعدا وهو يأكل) اي صديق عمرك .. بيه احنا مترافجين و احنا عمرنا ١٥ سنة .. يعني في خمستعشر سنة مب محسوبين .. يعني انا صديق جزء من عمرك ..
- مبارك : يعني ماتبي تساعدي ياخلف؟
- خلف : فلوس ماعندي ..
- مبارك : لا لا مب فلوس .. اذا تبي فلوس انا بعطيك... المهم ابيك توقف معاي
- خلف : دام بتعطيني فلوس .. افا عليك اوقف معاك واتصور سيلفي بعد.
- مبارك : ابيك تروح معاي تخطب لي.
- خلف : (يضحك بقوة)
- ((الممثلون ومعهم عباس وراجو ينتبهون لضحكات خلف وسخريته من مبارك ، يحيطون بهما وهم يستمعون لما يدور بين مبارك وخلف)).
- مبارك : هالشى مايضحك ياخلف .. كل اللي ابيه منك ... انك تروح معاي وتمثل انك ابوي .. يعني بنفس مكياجك وبنفس شكلك .. وتخطبلي البنية اللي احبها..
- خلف : (معترضا ورافضا) لا لا .. انت اكيد مهب صاحي .. مجنون انت؟؟
- مبارك : اعتبرني مينون .. بس تكفى اوقف معاي .. محد غيرك بينقذني .. هالمعروف مابنساه لك طول العمر
- خلف : اي معروف مبارك .. انا ممثل على المسرح .. بس اللي تبيني اسويه مهب تمثيل هذا يسمونه انتحال شخصية وتزوير ..
- مبارك : ياخلف .. ترى الموضوع سهل.. وانت بهالمكياج جاهز ومحد بيعرفك .. ابوالبنية مايعرف ابوي ولا عمره شافه .. ولا يهمه من انا ومن ابوي .. كل اللي يهمه .. اني ادفع المهر اللي طالبه ..

- عثمان : (يتداخل معهما مستفسرا باهتمام) وهو طالب كم؟؟
- مبارك : نص مليون..
- عباس : شنو؟! .. نص مليون .. ليش .. بنته مطلي ذهب؟؟!
- مبارك : هذا غير الذهب .. ببيني اشتريها ذهب .. بسبعمية الف .. وفيلا بعد ...
- عثمان : الزول ده طماع .. صحيح انه زول واطي.. (يتحدث للمثلين) يا جماعة احنا لازم نوقف مع اخونا مبارك عشان يتزوج البنت اللي بيحبها .. اجورنا بتعت المسرحية دي لازم نتبرع فيها لـ اخونا مبارك.
- خلف : من صجك .. من زين الاجور .. كم بيعطونا في هالمسرحية .. انا دوري بطولة بيعطوني خمستعشر الف .. لو تبرعنا بأجرنا مال عشرين مسرحية بعد ما بنجمع نص المهر اللي طالبه ابو البنية.
- مبارك : مانقصرون ومشكورين .. انا مهيب محتاج الفلوس .. الفلوس تدبر .. باخذ قرض من البنك .. لكن مشكلتي ان ابو البنية مصر ان ابوي يجي .. وابوي رافض .
- سلمان : وليش رافض ؟
- مبارك : ابوي رافض المهر .. ورافض طلبات ابوالبنية .. يقول اللي بيع بنته .. مافيه خير ولا احط ايدي في ايده
- عباس : صراحة مبارك .. ابوج معاه حق .. وعلى قول المسلات ... اللي هذا اوله .. سده واستريح.
- مبارك : (يتجاهلهم ويتحدث الى خلف بأمل) ها ياخلف .. اشقلت؟؟
- خلف : لا يبه .. فكني .. انا ما اقدر امثل دور ابوك .. لو ابو البنية كشفني وعرف اني مب ابوك مايسكت .. ويبيلغ الشرطة .. بتستوي سالفه ..
- مبارك : افا ياخلف .. افا والله .. ماهقيتك تترك اخوك بهالورطة ..
- (خلف يغادر المسرح بانزعاج ، مبارك يلتفت الى الجميع بحسرة وضيق ويبدو على الجميع التعاطف معه ، يقترب منه عباس)
- عباس : زين مبارك .. انت الحين ماعندك عم ماعندك خال يروح بدال ابوك.
- مبارك : لا ماعندي لا اعمام ولا اخوال..

- عباس : اشدعوة .. يعني طالع بروحك فقع .. زين يا اخ فقع .. قولي .. انت ماعندك عيال عم ولا عيال خال ؟
- مبارك : اشفيك يا عباس .. اقولك ماعندي لا اعمام ولا خوال .. اشلون ببصير عندي عيال عم وخوال.
- عباس : يعني انت جذي صرت .. مثل فقع وجراوة ... (ينادي اصحابه) يا جماعة تعالوا معاي فكروا خل يشوف حل حق هالفقع المسكين.. اقول انت يازوله ماعندك فكرة .. ماعندك حل ؟
- عثمان : والله انا بقول ان احنا لازم نحارب الغلاء .. ونحارب المفسدين .. ونوقف ضد هالغلاء .. وانت يامبارك لازم تنسى هالبنبت.
- راجو : (مغتاضا على عثمان) انت مجنون .. عصمان انت مافي مخ .. هو يحب لاركي .. انت مافي قلب .. مبارك يسوي يحيي .. هذا بنية الحين هو داخل قلب مال هو ..
- سلمان : (مواسيا) هونها وتهون يا مبارك .. وكل امرك لله .. وان شاء الله اذا لك نصيب بتاخذ غصين عن ابوها وعن الجميع.
- عباس : صح .. وعلى قولة المسلات اللي ماتطاله ايدك .. مايحك ظهرك .. صدقني انا لو يقدر يساعدك جان ساعدتك.. بس مافي باليدات حيلات .. لو تبي ابيع الخباز مالي ابيع .. مايردك الا لسانك ..
- مبارك : ماتقصر يا عباس .. جعلك نخر
- عباس : نخر الله عدوك .. ترى انا اتكلم من صحي يا مبارك .. مهر مال البنية مالك نص مليون .. ولو المخبز مالي يجيب نص مليون جان باعيته واعطيتك الفلوسات .. بس خساره المخبز مايسوي غير مليون.. وعلى قولة المسلات العين حصيرة .. وحلاة الثوب رقعة منه وفيه.
- مبارك : يا جماعة انا اللي غلط والا هم .. في المدارس كانوا يدرسوننا ان الانسان قيمه.. الانسان اهم من المادة .. ان مهبط كل شي فلوس .. بناء الانسان اهم .. اتعشر سنة ندرس اشياء مانشوفها في حياتنا ولانحس فيها ..
- عثمان : انت من اي مدرسة متخرج؟! .. مستقلة ولا حكومي؟! .. عادي يامبارك .. مش كل شي تعلمه لازم تطبقه ..
- مبارك : زمن غريب وعجيب اللي نعيشه ..



رؤية عالمية بهوية وطنية

A Global Vision of National Identity

9

عباس : على قولة المسلات .. اذا ماطاحك الزمان طيحه .. انت لازم تتطيح على الزمان قبل ما يتعشى عليك.

سلمان : مبارك .. لا تحكم على مستقبلك من تجربة .. المستقبل فيه اشياء اجمل .. اذا راحت هالبنات .. في غيرها ويمكن بتلقى احسن منها..

راجو : مبارك .. اذا انت يبي يسوي زواج .. انا يزوج انت اختي مال انا .. مافي مهر واجد .. انت سوي بس اقامة .. (يقلد الاعلانات) وكل ده بس بخمسمية ريال زايد مصاريف الشحن..
(مبارك يغادر المكان بحزن ، بينما يتابعه الآخرون بنظراتهم متأثرين لحاله)

انظلام

الفصل الاول/ المشهد الثاني

المنظر :

صالة منزل بوالريم، منزل شعبي متوسط الحال ، تظهر الريم وهي فتاة في اول العشرينيات مع صديقتها فتون في نفس عمر الريم ، وهما تدخلان المسرح بتوتر بينما الريم تسحب حقيبة صغيرة وتجرها.

الريم :

(بتوتر تستعجلها) يلا يلا يافتون بسرعة .. قبل لا يوصل ابوي.. يلا خذي الشنطة وروحي)
تعطي الحقيبة لفتون)

فتون :

(تلتقط الحقيبة بخوف وتردد ، تهم بالخروج ثم تتراجع) الريم .. انا خايفه .. الله يخليج ياالريم
لاتورطيني معاج.

الريم :

فتون صار لي ساعة اقنعج والحين عقب مالتقنا وخططنا تبين نتسحبين

فتون :

ان درى ابوج باللي بنسويه لا يذبج ويذبجني.

الريم :

وابوي اشلون بيدري؟؟ .. الا اذا انتي أو انا قلنا له.

فتون :

عقب ما انفذ الخطة اكيد بيدري.

الريم :

يكون انا ومبارك تزوجنا وخلص .. عقب مهيب مهم اذا درى .. مايقدر يسوي شي ولا يقدر
يبعدنا عن بعض.

فتون :

(بسخرية واحباط) كلام .. مافي شي يفرقنا .. ولا يبعدنا عن بعض .. هذي اولها بس.. نظري
عقب سنة بتغيرين رايج ..

الريم :

(بتأكيد) انا ومبارك بنتم نحب بعض طول العمر

فتون :

بلا حب بلا نيلة .. انا اذا بغيت اتزوج .. مايهمني احبه ويحبني .. المهم عندي يكون غني
وقادر يصرف علي.. واكشخ قدام الناس.

الريم :

(بتملل) خل عنج هالسوالف الحين .. يلا خذي هالشنطة وروحي ..

فتون :

(بتردد وخوف) يعني انتي الحين مافي جدامك غير الحل

الريم :

ليش انتي عندج حلول ثانية .. اذا عندج حلول قوليلي؟

فتون :

ما ادري .. بس .. بس يمكن ابوج يتغير .. ويغير رايه.

- الريم : وشاللي بيغيره .. اذا بنته ماهمته ولا اكسرت خاطره .. ومهب مهم عنده من يتزوجها .. المهم منهو يدفع .. لا يافتون ابوي ماراح يغير رايه
- فتون : اذا ابوج ما اتغير .. يمكن مبارك يقدر يقنع ابوه .. ويوافق انه يجي يخطبج.
- الريم : يعني اذا المبدأ الغلط اللي هو ابوي .. مافي امل يتغير.. ليش ننظر الصبح هو اللي يتنازل ويتغير.
- فتون : (بتخوف) ما ادري ليش حاسه ان هالخطه بتفشل
- الريم : خل نجرب .. التجربة في الوقت الضائع ممكن تنقذنا.
- فتون : بس هالتجربة فشلها مصيبة وفضيحة .. واذا مبارك بيوافقج على الشي .. في النهاية هو ريال .. مايهمه شي .. الريال في مجتمعنا دايمًا سجله نظيف ..
- الريم : (بضجر وانفعال) فتون .. هاتي الشنطة خلاص وروجي .. (تحاول ان تاخذ الحقيبة من يد فتون) مشكورة ما ابي منج شي ولا ابيج اتساعديني .. (بانفعال وهي تخرج من جيبها جوالها) الحين بتصل في منيرة وبخليها تساعدني..
- ((الريم تهتم باجراء الاتصال ، تسرع فتون بضيق وتخطف التليفون من يد الريم))
- فتون : انتي اشفيج عصبتي.. انا انصحج قبل لا تتورطين.
- الريم : (بانفعال) ما ابي نصايح.. عطيني .. هاتي التليفون خل اتصل في منيرة
- فتون : (باصرار وعناد وهي تضع التليفون في حقيبتها) مافي تليفون .. ومابتكلمين لا منيرة ولا غيرها .. مافي احد غيري اللي بينفذ معاج الخطه ..
- الريم : زين عيل يلا خذي الشنطة .. كل شي موجود في هالشنطة .. يلا انجلعي قبل لايرد ابوي ويشوفج اهني.
- ((فتون تنظر لها باستنكار ، ثم تهتم فتون بالمغادرة وهي تسحب الحقيبة بتوتر ، فتسمع هي والريم صوت فتح الباب الخارجي مع صوت سعال بوالريم فتصاب الاثنتان بالارتباك والخوف))
- الريم : ابوي .. ابوي ...
- فتون : شا اسوي .. لو شاف الشنطة شا اقوله؟
- الريم : تعالي .. تعالي انخشي .. بسرعة ..

((الريم تأخذ فتون وهما في حالة خوف وتخفيها خلف منضدة او كنبه ومعها الحقيبة ، ثم تسرع وتقف عند المدخل في ترتب وارتيباك ، يدخل ابو الريم رجل خمسيني وهو يتحدث بالحوال))

الريم : (تستقبله بتوتر وارتيباك) هلا بيه .. عساك على القوة

ابو الريم : (يرد على ابنته) هلا بيه .. (يتابع مكالمته) اي يا ام خميس انا معاج .. اي مثل ماوصيتج .. مابتازل عن اي شرط او طلب ..

الريم : (بقلق وتوتر) بيه .. هذي اللي تكلمها ام خميس الخطابة؟

ابو الريم : (ينظر لها بنظرة غضب ويشير لها بالسكوت) اي معاج يا ام خميس .. (يترك الصالة وفي طريقه للمغادرة الى الداخل يتابع مكالمته) انتي قوليلي شالبضاعة اللي عندج .. في شي يسوى ؟.. جابر؟! .. منهو جابر؟

الريم : (تسرع نحو فتون وتخرجها من مخبئها) فتون .. سمعتي يافتون .. ابوي كان يكلم ام خميس الخطابة... اكيد ناوي لي على نية..

فتون : الحين طلعي من اهني بسرعة قبل لايرد ابوج ..

الريم : اي بسرعة يافتون طلعي .. بس فتون لازم الخطة تتنفذ اليوم .. انا حياتي بين ايديج .. وما ادري ابوي اش يدبر ويخطط ..

فتون : تظمني .. كل شي ببصير حسب الخطة .. خلع جاهزة .. انا لين اجي لج البيت باتصلج تليفون...

((فتون تغادر المنزل ومعها الحقيبة ، بينما تبقى الريم مكانها واقفه عند المدخل تفكر بقلق ، الى يدخل ابو الريم بعد انتهاءه من المكالمه))

ابو الريم : (مغتاظا وبعبسية) انتي اشعندج واقفة عند الباب .. تتطرين احد؟

الريم : (بارتيباك) لا بيه ما انظر احد ..

ابو الريم : ليكون تطرين مبارك ؟؟ .. ليكون يكلمج ؟

الريم : (بخوف وارتيباك) ها ؟؟! .. لا لا .. بيه اشدعوة يكلمني .. ليش يكلمني .. اشبيني وبينه .. لا هو من هلي ولا مالك علي.

ابو الريم : (بتشكك) عيل ليش واقفه تتطرينه عند الباب؟؟ .. اشدرج انه بيحي الحين؟

الريم : (متفاجئة) بيحي .. م .. مبا .. مبارك بيحي ؟ .. ليش بيه؟؟

ابوالريم : كلمني من ساعة وقال لي بيجي هو وابوه .. (ينظر لساعته) اشفيهم تاخروا.. المفروض الحين يوصلون

الريم : (باريتاك وتوتر) ييه .. هو قالك .. قالك ان جاي مع ابوه ..

ابوالريم : اي قالي جاي ومعاها ابوه .. وموافقين على كل الشروط .. وهذا اللي ابوه .. (الريم في حالة شرود وقلق) انتي بنتي الوحيدة ... ولازم اللي ياخذج يعرف قيمته .. ما ادري ليش قلبي قارصني ومهب مرتاح لمبارك .. (يهمس مع نفسه بتمني) اخ بس لو ام خميس تصدق واتطرش لي اللي قالت لي عنه .. يطقني بذاك الشيك ويشيلج..

الريم : ييه انت متأكد ان مبارك جاي الحين؟؟

ابوالريم : اي .. متأكد .. (مستركا) الريال في الدرب جاي مع ابوه.. واذا ادفعوا المهر اللي طالبيته ووافقوا على كل طلباتي وشروطي .. نملك الليلة ..

((صوت جرس الباب))

ابوالريم : هذا هم اوصلوا يلا دشني داخل ((يغادر ليفتح الباب))

ريم : (بتوتر وشرود) ليش ماقالي .. ابي اعرف شاللي صاير .. (تفتش جيبها باحثه عن تليفونها) وين تليفوني .. ها .. (متنبهه) تليفوني خذته هالغيبه فتون ..

ص. ابوالريم : (نسمع صوته من الخارج) يا هلا يا هلا.. حيا الله من يانا .. حياكم .. تفضلوا..

((الريم تسرع بالخروج من المسرح وهي في حالة توتر))

((يدخل ابوالريم وبصحبه مبارك متوتر ومعه صديقه خلف الذي يتنكر بشخصية رجل شايب ويبدو خائفا ومتوتر يتلفت حوله متردد بينما يسحبه مبارك))

بوالريم : حيا الله من جانا .. تفضلوا .. حياكم.

مبارك : (يسحبه بقوة) تفضل ييه .. ييه تعال .. احنا مهب اغراب .. هذا بيت النسيب

خلف : (يهمس لمبارك) محد بيوهقني غيرك يا مبارك ..

بوالريم : (يسأل مبارك) مبارك .. اشفيه ابوك؟؟ .. كأنه جاي مغصوب ..

مبارك : لا عمي .. اشدعوه مغصوب .. ابوي جاي بنفسه وموافق على الزواج وعلى المهر وعلى كل الشروط ..

بوالريم : زين استريحوا .. خل اروح اجيب القهوة

مبارك : اي خذ راحتك ياعمي.

(يغادر بوالريم المكان ، يتبعه مبارك بقلق ليتأكد من مغادرته ثم يعود مغتاضا نحو خلف)

مبارك : خلف اشفيك .. اذا تميت ترقل جذي .. بتفضحنا وبتنكشف ونروح في داهيه.

خلف : يعني ارقل بكيفي .. هذي رقلة الخوف ..

مبارك : اشمه خايف .. ان شاء الله الامور بتعدي على خير ..

خلف : زين واذا ابوها وافق وتزوجتوا .. عقب لين شاف ابوك الصجي وش بتسوي

مبارك : لين اتصير الريم زوجتي ماله شغل فيني .. المهم اتزوجها.

خلف : انا ما ادري اشلون قصيت علي واقنعتني احي معاك ..

مبارك : وبعدين معاك ياخلف .. خلاص الحين وصلنا .. هم كلمتين بتقولهم جايين نطلب يد بنتك

حق ولدي مبارك .. وخلاص ..

خلف : امري لله .. الله يعدي هاليوم على خير.

مبارك : بس ما اوصيك ياخلف .. اي شي يطلبه وافق .. تكفي لا ترفض اي شي.. خلنا نخلص

الموضوع على خير ياخلف

خلف : ان شاء الله .. بس خل هالنفضة اللي فيني تروح ..

((يدخل بوالريم مرحبا بهما ومعه دلة القهوة والفناجين))

بوالريم : يا هلا .. يا حيا لله من جانا

مبارك : الله يحييك ياعمي ..

بوالريم : هذا هو ابوك ؟؟

مبارك : اي عمي .. اي هذا ابوي (يضحك) اشدعوة .. يعني متسلفه .. حد هالاياام يسلف ابو .. اي

ابوي من لحمي ودمي .. ان شاء الله اعجبك

بوالريم : يعني زوين .. ماشي حاله ..

خلف : ((يهمس له باعتراض)) شنو اعجبك ما اعجبك .. وين تلقى اب احسن مني

بوالريم : اشلونك يا بومبارك

((خلف يبدو مضطربا ومرتبكا ولا يستطيع ان يرد))

بوالريم : مبارك .. اشفيه ابوك ما يرد

مبارك : (يبتسم وهو يلکز خلف هامسا) يبه رد .. عمي بوالريم يحاجيك

خلف : (بتلعثم وخوف يهمس لمبارك) وش اقول؟؟

مبارك : قوله انت بخير ..

خلف : (بارتباك) انت بخير ..

بوالريم : وشو تقول؟؟

مبارك : قصده يقولك ان هو بخير .. الوالد اشوي مب صاحي .. تعبان

بوالريم : الله يشفيه .. يا هلا فيكم ويا حيا لله من جانا

مبارك : ((يهمس له محرضا)) يا لله قول وخلصنا (يدور بينهما حوار هامس)

خلف : وشو اقول؟؟

مبارك : كلمه واخطب لي البنية منه

خلف : اي عاد ما ادري شيقولون

مبارك : انا حفظتك الكلام اللي بتقوله

خلف : نسيت ..

بوالريم : انتوا اشعندكم تتاسرون ..

مبارك : مافي شي ياعمي .. بس ابوي يقولي اشوي تعبان ..

خلف : اي تعبان وايد .. احس بعوار في بطني ..

بوالريم : اصبر .. عوار البطن حله عندي .. انا اجيب لك دوا

(يغادر بوالريم المكان ، مبارك يتحدث لخلف بتوسل)

مبارك : واللي يرحم امك يا خلف .. خالصنا من هالسالفه .. الريسال مصدق انك ابوي .. اخطب لي

الريم وخلصنا نجيب الملاج يملج ونخلص ..

خلف : زين اسكت اشوي خلني اركز وانتذكر وش بقول.

(خلف يحاول التذكر ، تظهر الريم من باب اخر في زاوية الصالة مرتبكة وخائفه ، وتنادي مبارك بصوت هامس)

الريم : مبارك ... مبارك..

مبارك : (يلتفت ويلمحاها ، يسرع نحوها بشوق وفرح) الريم .. هلا ..

الريم : انت شاللي يابك ؟

مبارك : (مستغربا) جيت علشان اخطبج ..

الريم : (تلومه بلهجة حادة) وليفش ما قلتي ان ابوك وافق يجي معاك..

مبارك : هذا مهيب ابوي .. هذا خلف رفيجي ..

الريم : انت قلتي انه رفض يجي وينتحل شخصية ابوك

مبارك : اي امس رفض وتميت وراه لين اقنعتة ووافق .. على طول اتصلت في ابوج وقلت له جايينك وسحبته وجيت..

الريم : (بقلق وتوتر) كان المفروض نقولي يامبارك .. الحين فتون راحت .. وتليفوني معاها وما اقدر اتصل فيها واقولها اتكنسل الخطة ..

مبارك : (باستغراب وتوجس) اي خطه .. واشفيها فتون ؟؟ .. الريم اشصاير؟

خلف : (يقرب منزعا وينهره بغضب) انت واقف عندك اتغازل ومسوي فيها روميو ولا هامك شي .. ومخليني بروحي اتنافض واحفظ الحوار ..

مبارك : (بعصبية) اقول كل تبين واسكت .. وروح تذكر حوارك عدل

خلف : انا برويك منهو اللي بياكل تبين .. (ينادي باعلى صوته) ابوالريم .. ابوالريم.

((تسرع الريم بخوف بالهرب من نفس المدخل ، بينما يسرع لاسكات خلف محاولا ان يضع يده على فم خلف الذي يواصل الصراخ ، الى ان يدخل ابوالريم وهو يمسك بيده كوب))

ابوالريم : خير .. خير .. عسى ماشر ... اشفيك يابومبارك تصارخ

مبارك : (مستدركا) من الالم .. (يغمز خلف) صح بيه من الالم ..

خلف : (يمد يده لمبارك ليقبلها مساوما ويرضح مبارك له) اي من الالم .. عوار قوي..

بوالريم : ابشر يا بومبارك الحين العوار بيروح .. (يقدم له الكوب الذي في يده) خذ هذا الدوا اللي بيطير عوار بطنك.

خلف : (بخوف) اي ادوا يا بوالريم .. انا .. خلاص انا صرت زين.

ابوالريم : توك تصارخ من الالم؟

خلف : اقولك انا صرت زين .. مافيني شي خلاص

بوالريم : معلية ياريال .. حتى لو صرت زين اشرب هالدوا .. ما بيضرك .. الا بيبيدك

خلف : لا لا .. مهيب شارب .. خلاص قلت لك العوار راح ..

بوالريم : اشدعوة يا بومبارك .. متعني واقف ساعة في المطبخ .. اسسوي هالخلطة واخرتها اتقولي خلاص .. تراك بتزعطني منك

مبارك : (يقلق) اشرب بيه .. اشرب .. لاتزعل عمي بوالريم

خلف : (نافرا بانفعال) اقولكم مافيني شي .. اشبلاكم انتوا

بوالريم : اي الظاهر انت يا بومبارك من ذبلا اللي يخافون يشربون الدوا .. سوالف العيارة مب علي ..

مبارك : يوده وابطحه .. (مبارك يهجم على خلف الذي يقاوم مبارك ، وينجح مبارك

ويبطحه ارضا) افتح حلجه بالقوة (يفتح مبارك فم خلف ويقوم بوالريم بوضع المحلول في فم

خلف الذي يشعر بمرارة) خلاص اتركه .. (يبتعد بوالريم عنهما) الحين دقائق وبيرتاح بطنك ..

مبارك : (يهمس لخلف معذرا) اسف يا خلف .. بس ما اقدر ازعل عمي ..

خلف : (يقف غاضبا ويهمس بضيق وانزعاج) انا اروييك يا بروك .. اروييك ...

بوالريم : ها ؟ .. اشلون صرت الحين يا بومبارك؟؟ .. الدوا مر اشوي .. بس بيريحك.

((صوت جرس الباب)) (يذهب بوالريم ليفتح الباب)

خلف : (يتجهج على مبارك ويتعارك معه) جذي اتسوي فيني ؟

مبارك : اعقل يا خلف .. اعقل ... (يسقطان على الارض)

(يستمر العراك بينهما ، لحين دخول بوالريم عليهما وهما على الارض يتعاركان ، ويتفاجئ بعراكهما يقف مستغربا).

بوالريم : هيه .. انتوا اشفيكم ..

(مبارك و خلف ينتبهان لدخول بوالريم عليهما ويقفان مرتبكان)

بوالريم : (باستكار) معقول اللي اشوفه .. الولد يضرب ابوه ؟؟

مبارك : (بيرر مرتبكا) لا عمي .. اشدعوة اضرب ابوي .. هذا ابوي (مبارك باشمنزاز يقبل رأس

خلف) انا والوالد متعودين نلعب جذي .. صح بيه؟.

خلف : (يستغل الفرصة ويلطم مبارك على وجهه متشفيا) جب ولا كلمة .. انا ابوك واحترمني قدام العالم .. (يلطمه مرة اخرى بقوة)

بوالريم : اوه .. نسيئونني الضيف .. خليته واقف برا .. تفضل ياخوي ..

(يدخل عباس الذي غير في شكله جزئيا ويظهر شعره ابيضا حيث يدل شكله المبالغ فيه بأنه رجل مسن بشكل كاريكاتوري)

عباس : السلام عليكم ورحمة الله وبركاته .. اهوال شوما

بوالريم : خلي ممنون..

عباس : اها .. مبارك اهني .. الحمدلله اني لقيتك اهني ياولدي ..

(مبارك وخلف ينظران لبعضهما مستغربان بتوتر ، حيث لا يعرفان عباس في البداية ولم يفهما بعد سبب وجود عباس)

بوالريم : يالله حيه .. استريح يا اخوي

عباس : عدوك الريح لا ..

بوالريم : ماعرفتنا عليك بالطيب ..

عباس : افا .. افا والله يا بوالريم .. ماعرفتني ..

بوالريم : السموحة ياخوي .. ماعرفتك ..

عباس : الغلط مو عليك انت ... الغلط على ولدي هالثور (يشير على مبارك) اللي ماعرفك علي (

الجميع في حالة استغراب ، مبارك يبدو مرتبكا)

بوالريم : ولدك ؟؟! .. منهو ولدك؟؟

عباس : مبارك .. هذي ولدي ..

- مبارك : (يضرب على رأسه متفاجئا) رحنا وطي .. (مبارك وخلف يقفان جانبا يتابعان ما يحدث بخوف وقلق وترقب)
- بوالريم : (متفاجئا في حيرة) يعني مبارك هذا اللي واقف قدامك .. هذا .. ولدك انت؟
- عباس : اي بلي .. ولدي من شحمي ولحمي ..
- بوالريم : من متى هو ولدك؟
- عباس : يعني من زمان .. يوم ولدونه عقب خمس دقائق سجلوه باسمي وصار ولدي ..
- بوالريم : انت متأكد ولدك؟؟
- عباس : (يمثل الانفعال) افا عليك .. شنو هالكلام يا بوالريم؟؟ .. اشقصدك؟؟.. قصدك انا ما اقدر اجيب عيال .. والا يمكن سامع كلام .. منيه مئاك .. تراك خليت الفار يلعب داخل قلبي ..
- بوالريم : اذا تعرف الصبح قول تكلم .. مبارك ولدي والا لا؟؟
- بوالريم : (بسخرية وهو ينظر الى مبارك وخلف) اسأل ولدك وهو يقولك.
- عباس : (يقف محتدا ويقترب من مبارك) انت يا صبي .. انت ولدي والا مو ولدي
- مبارك : (مشوشا ومرتبكا) ها ..
- عباس : دام قال ها .. يعني ولدي .. وعلى قولة المسلات .. من قال ها .. لي فات الفوت ماينفع الصوت.
- مبارك : (يهمس لعباس مغتاظا) عباس انت شاللي جابك ؟
- عباس : (هامسا) انا جاي اساعدك .. يوم شفتك بالمسرح اتصيح .. فليت خاطري.. ما رقدت الليل .. ولا قدرت اسوي خبز .. طول اليوم افكر .. وفكرت فكرة مايخطر على بال فكار .. قلت اجي حق بوالريم بدال ابوك واخطبه لك.
- مبارك : (يهمس بغیظ) انت منهو اللي قالك ابي مساعدتك..
- عباس : (عباس يشيح بيده ويحركها خلال حوار) الحين هذا جزاي بدال مانقول الله يرحم والديك والله انك ذيب ونشم يا عباس .. هذا جزاء النشاشيم .. تقولي هالكلام .. لكن على قولة المسلات تسوي خير .. والعين بصيرة (وهو يحرك يده تضرب يده في خلف)
- خلف : (يصرخ متألما وهو يضع يده على بطنه) بطني

- عباس : (ساخرا) اشدعوة .. انا ضربتك في ايدك .. بطنك عورك اشلون؟.
- خلف : (يواصل الصراخ) بطني
- عباس : في ذمتي ماسويت له شي ..
- بوالريم : ماعليك .. هذا من الدوا .. الحين الدوا اشتغل مفعوله ... تعال .. تعال (يسحبه صوب الباب الداخلي) الحمام يمين. (يخرج خلف بسرعة)
- مبارك : (يهمس لعباس بغيط) الحين ماتقولي شاسوي فيك
- عباس : ليش انا شنو سويت .. انا مصكر الخباز مالي وجاي علشان اسويك خير..
- بوالريم : انتوا اشعندكم .. خلصوني قولوا لي اشعندكم
- مبارك : (بارتيك وتوتر) لا عمي بس..
- عباس : اسكت .. اسكت ياولد .. انا يتقاهم مع الرجال .. الريالات لين يتكلمون .. الصبيات ينظمون
- (يقترب من بوالريم) ما في شي فديت عمرك يا بوالريم .. بس الولد بيبي يدش في الموضوع بسرعه لا .. مستعيل وايد لا
- بوالريم : زين يالله دش في الموضوع وخلصنا
- عباس : اي بيدش بس اصبر لين يفتحون الباب
- بوالريم : (بانفعال) اي باب
- عباس : (يضحك) اشفيك يا بوالريم اتحمق .. اتغشمر معاك لا .. صاير مثل عيال هالزمن وايد مستعيلين .. الله يا زمان اول.. تذكر ذبح الايام يا بوالريم
- بوالريم : اي وانت صادق يا بومبارك .. ايام اول كانت احلى
- عباس : أي نعم .. والله انه كان ايام نشميه .. الله يرحم ايام الغوص .. تذكر يوم كنا نروح الغوص في البحر لا ..
- بوالريم : عيل في غوص في البر .. الله يهداك ..
- عباس : اذكر يا جماعة الخير مرة واحد .. كان أول مرة ركبت المحمول .. كان عمري اثعشر سنة .. عاد امي زينخلو كان وايد معياني اركب المحمول

- بوالريم : محمول .. أي محمول ؟
- مبارك : قصده المحمل .
- عباس : (يتابع بحماس) اي هذا هو نفسه .. بس المحمول اشوي اكبر .. تصدقون يا جماعة الخير انه جانه واحد قوي دالوب كبير ..
- بوالريم : اوه .. بس عساكم ما طبعتموا
- عباس : طبعنا طبعاً .. انا الحين صار لي سنين وانا طابع .. ايامها غرق كل الغواصينات ما عاش الا اسنين بس ..
- بوالريم : وشو اسنين ؟؟
- عباس : اسنين .. يعني اسنين .. دو
- مبارك : (يضحك مجاملاً) ابوي قصده يقولك اثنين ..
- عباس : لا هم كانوا اسنين .. انت كنت توك صغير في بطن امك .. للحين ماطلعت ولا تعرف شي .. هم اسنين شفتهم بعيوني سنين بس
- بوالريم : اي اذكر سمعت بهالسالفه .. المحمل اللي غرق وماعاش غير اثنين
- عباس : لا يا بوالريم .. اسنين اللي عاشوا .. انا كنت في المحمول نفسه .. اسنين اللي عاشوا والباقي كل ابوه فنقشوا
- بوالريم : زين احنا اشقلنا .. قالنا لك اثنين
- عباس : (بضجر) الله اكبر .. انا يقولك اسنين .. خو انت كنت معانا في المحمول
- بوالريم : لا ..
- عباس : عيل كل تبين ولا تحط في ذمتك .. هذا تاريخ .. لا اتزور التاريخ .. أنا اقولك سنين بس اللي عاشوا .. انا واحد منهم والريال الساني مات قبل لانروح الغوس .
- مبارك : (هامساً بضيق) عباس .. تكفى خلك من الغوص ودش في الموضوع ..
- عباس : المهم ماعلينا .. اشلنا في الغوس والبحر .. ورزق الله على السيف ..
- مبارك : (مشجعاً بهمس) يا لله دش بالموضوع الحين

- عباس : (بضيق لمبارك) انت بطيت راسي لا .. خلك في الموضوع .. دش في الموضوع .. ذبحتني .. قهرتني لا .. انت شايفتني طالع من الموضوع الحين .. مافصخت الموضوع .. انا لابس الموضوع .. لين شافيتني شاليت لحيتي من ويهي وشاليت هالطحين الابيض اللي حاطه على راسي .. قلبي انت طلعت من الموضوع ..
- مبارك : (بهمس) اسف يا عباس .. بس انا متوتر اشوي .. ابي اخلص من هالموضوع
- عباس : زين اسكت احسن .. خلني انا الريال اتفاهم مع الريال .. (عباس يقترب من بوالريم ويتبعه مبارك بقلق) حيا الله النشم .. والله انك نشم يا بوالريم .. انت وايد نشم وبعد راعي نخله
- مبارك : (يهمس له) نخوه نخوه .. مب نخله ..
- بوالريم : (بضيق) بومبارك ترى انا عندي مشاغل .. خلصني دش بالموضوع
- عباس : انت بعد يبيني ادش بالموضوع .. زين صبروا بندش لا..
- بوالريم : (بعصبية) بيه خلصني قلبي اشعندك
- عباس : عندي مخبز سلمك الله .. مخبز يسوي جميع انواع الخبز .. ويسوي طريح .. ومهياوه .. تصدق كل العالم يشترون مهياوتي .. حتى في اليابان ياخذون مهياوتي .. يقولون ان مهياوتي يوسع عيونهم
- بوالريم : (بعصبية) انا شاللي بالمخبز والمهياوة .. انا قصدي اشعندك ؟ .. اشتبي ؟؟ .. شالموضوع اللي جاي علشان
- عباس : الله يسلمك يا بوالريم انا جايبك اليوم علشان بيطلب منك طلب واحد
- بوالريم : (بضيق) امر .. قول اشعندك؟
- عباس : عندي مخبز .. من اشوي قايلك لا.
- بوالريم : (بغضب) انت وبعدين معاك ... قول اشتبي مني وخلصني
- عباس : انت الحين ليش امعصب .. توني اقول عنك نشم .. والنشاشيم هالاياام اشوي
- بوالريم : مبارك .. خذ ابوك .. واذلقوا عن ويهي .. ياالله اذلقوا ..
- ((يدخل خلف وهو مجهود بعض الشيء ولقد شعر بالراحة))
- خلف : اوف .. اخيرا ارتحت ..

بوالريم : (بتلميح وسخرية) مبارك .. الحمد لله سلامة ابوك الثاني ..

عباس : شنو؟؟ .. ابوہ الثاني .. اشلون يعني ابوہ الثاني؟؟ ..

((صوت جرس الباب)) ((بوالريم يتركهم ويذهب ليفتح الباب))

مبارك : (بغضب) عباس انت ليش ماقلت لي انك بتجي اهني؟

عباس : يامبارك .. انا كنت بيبي يسوي لك مفاجعة .. اخطبك بعدين افاجعك واقول بوالريم وافقت على

الزواج .. وعلى قوله المسلات .. تأتي الرياح واللي في الجدر يطلعه الملاس.

((نسمع صوت بوالريم من الخارج وهو يرحب بالقادم))

ص. بوالريم : حياالله بومبارك .. تفضل يا بومبارك

مبارك : (مصدوما) ابوي وصل ابوي .. شسوي .. اكيد أحد قاله اني جاي اخطب بدونه

خلف : (يضع يده على بطنه) انا بروح الحمام (يخرج)

عباس : ابوك السجي وصل .. الحين اتورطنا وراريط عود .. وجايد

((يدخل بوالريم ويرافقه عثمان الذي يلبس الملابس الخليجية و البشت وهو يغير من شكله كي يظهر اكبر سنا))

بوالريم : يا حياالله بومبارك.

عثمان : الله يحييك .. ازيك يازول .. ابني مبارك هنا ... يادي السعد يادي الهنا

بوالريم : (بسخرية وتهكم) مبارك .. اعرفك .. هذا ابوك الثالث ...

عثمان : (هامسا لمبارك باستغراب) ابوك الثالث؟؟ .. قصده شنو؟ ..

عباس : (هامسا لمبارك) هذا مو كأنه يشبه عثمان مال المسرح؟؟

مبارك : (بتوتر يشعر بالورطة يهمس لعباس) اسكت انجب ..

عباس : خيلي ممنون..

عثمان : انا عثمان الميرغني تاج السر من قبيلة الدوشانة ..

بوالريم : (بسخرية) هذا ابوك طلح قبيلي بعد ..

عباس : يعني انت الحين اسمك مبارك عثمان الميرغني تاج السر..

- بوالريم : تفضل يا بومبارك .. تفضل استريح ..
- عباس : شنو يستريح .. على كيفك يستريح .. لحظة اشوي خلني اتقاهم معاه .. اقول انت يالاخو .. انت منو ؟
- عثمان : انا ابو مبارك
- عباس : اذا انت ابومبارك عيل أنا اطلع أبو منو.. أبو الهول
- عثمان : انت يا مبارك .. تعال هنا .. مين الزول ده ؟ .. يقربك حاجة ؟؟
- مبارك : (بقه وخيبة أمل ويكاد يبكي) هذا ابوي ..
- عثمان : (مرحبا) ابوك .. يا اهلا اهلا .. كيفك يا ابو ابني
- بوالريم : مبارك .. الحين مانتقولي اشلون لك ثلاث ابهات ..
- مبارك : بصراحة يا عمي .. الاولي اللي بالحمام ابوي الصجي .. وهذا (يشير لعباس) ابوي بالرضاعة ..
- عباس : اي صحيح .. انا ابوه بالرضاعة
- بوالريم : زين وهذا الثالث ؟
- عثمان : اني .. ابوه من امه ..
- عباس : ماتركب .. عاد مو جذي يكذبون .. ((يتحدث لبوالريم)) اسمع يا بوالريم .. هالاياام كل شي يصير .. يعني مو غريبه اتحصل واحد عنده بهبهات وايد .. في وايد شباب اتحصل عنده ثلاثة تليفون .. اثنين سيارة .. يعني عادي ..
- عثمان : ابوه ده الكلام صحيح .. انا زوج خالتي .. متجوز ثلاث نسوان ..
- عباس : (مؤكدًا) صدقت الحين .. كل شي يصير هالاياامات..
- بوالريم : مبارك .. اسمعني .. انا الحين مايهمني من فيهم ابوك .. ابيك انت اتحدد لي ابو واحد فيهم علشان اقدر اتقاهم معاه .
- عباس : طبعًا يختارني انا ..
- عثمان : وليش يختارك انت .. لا ماحيختارك .. انا ابوه وانا اللي حاختر عن ولدي مبارك .. واختر نفسي للمهمة.

- عباس : على كيف بيتكم .. انا جاي قبلك اهني .. يعني انا اقدم منك .. انا ابوه من نص ساعة .. وانت ابوه من ثلاث دقائق ..
- بوالريم : بيه .. اذا المسالفة بالاقدمية واللي جاي قبل .. ترى هذا الريال اللي في الحمام اقدم منكم وجاي قبلكم ..
- مبارك : عمي اشريك انت تحل المشكلة وتختار .. شوف واختار الاب اللي ترتاح له ..
- بوالريم : لا انا عندي لك حل احسن .. بما ان عندك ثلاث ابهات .. الابو الاول خله رزه حق العرس قدام الناس .. والثاني مال الخباز .. سلمه الحسابات مالت المهر والعرس .. والثالث هذا (يشير الى عثمان) خله مسؤول الطبالات.
- عباس : والله انك جبته .. توزيعه مالك مال منتخب مب مال عرس .. انا موافق
- عثمان : وانا موافق ما عندي مانع
- مبارك : زين عمي دام ابهاتي متفقين .. ما قلتي مع من بتتفاهم على المهر والطلبات
- بوالريم : هذي امور عائلية بينك وبين ابهاتك .. انت اختار .. بخليكم اشوي تتفقون وتختار لي ابو واحد اتفاهم معاه.
- ((ابوالريم يغادر المسرح ، بينما الثلاثة ينظرون لبعضهم بترقب))
- مبارك : ((بعصبية يتهم على عثمان)) انت ماتقولي شاللي جابك اهني
- عثمان : اصلك صعبت علي كثير .. فقلت لازم اساعدك ..
- مبارك : زين جان قلتوا لي انكم بتساعدوني .. مهب اتفاجئوني جدي.
- عثمان : الحين خلك من هالكلام .. الزول قالك انه عاوزك تختار واحد منا علشان يكون هو المتحدث الرسمي للزواج ..
- عباس : طبعا احسن مني ما بتحصلون .. انا الخباز المناسب في المخبز المناسب
- عثمان : يا عباس انت ما بتصلح .. الموضوع ده عاوز واحد يتكلم عربي كويس
- عباس : يعني انت اللي عربي مالك كلش كويس .. العربي مالي اكوس من عربي مالك
- ((تدخل الريم من المدخل الجانبي وتنادي مبارك الذي يسع نحوها ، بينما يواصل عباس وعثمان خلافهما ونقاشهما بأسلوب صامت))

- الريم : (مناديه) مبارك .. مبارك..
- مبارك : خلاص ياالريم ابشرج كل شي محلول .. اشوي وبننتق مع ابوج على المهر
- الريم : زين .. منهو نيلا اللي معاك..
- مبارك : هنول ابهاتي ...
- الريم : شنو ؟؟ ...
- مبارك : لا تشغلين بالج .. بعدين افهمج السالفة ..
- الريم : مبارك .. بصراحة .. انا سويت شي من وراك..
- مبارك : (بقلق) شنو ؟؟ .. اشمسوية؟
- الريم : انت لما اتصلت فيني .. وقلت لي ان رفيجك خلف .. رفض يجي معاك ويسوي روحه ابوك .. جاتي فكرة .. واتصلت في فتون علشان تنفذها
- مبارك : (بتوتر) شنهني الفكرة ؟ .. وشاللي بتسويه فتون؟
- ((تحصل معركة وتشابك بالايدي بين عباس وعثمان ، تهرب الريم للداخل خائفه))
- عباس : (يصرخ بانفعال) انا المتحدث الرسمي ومافي حد غيري بيخطب حق مبارك
- عثمان : (منغلا بتحدي واصرار) وانا قلت ليك مافي غيري حيخطب لمبارك.
- ((يتدخل مبارك محاولا فض النزاع بينهم))
- مبارك : بس خلاص .. خلاص .. ما ابيكم تخطبون لي ..
- عباس : (بتصميم) انا راسي قفل .. وانا اللي بخطب لك .. حتى لو انت ماتبي بزوجك غصبن عن ابوك عثمان.
- مبارك : زين .. خلاص ياعباس .. انت بتكون المتحدث الرسمي حق الزواج .. وانت ياعثمان المتحدث الرسمي حق الطلاق... موافقين؟؟
- ((صوت جرس الباب، يدخل ابوالريم مسرعا ، يتوقف بجانب المجموعة معلقا))
- بوالريم : (بسخرية) خايف اروح افتح الباب .. يطلع ابوك الرابع.. ((يغادر))
- عباس : مبارك .. اسمع .. احنا اتفقنا ووزعنا الشغل مال الزواج بينا .. اذا طلع ابو رابع خله حق العيال الصغىرون .. زين..

ابوالريم : (يدخل ابوالريم مرحبا بتهكم) هلا والله .. حيا الله من جانا ...

((تدخل فتون وهي تتنكر بزي رجل كبير وتبدو متوترة ومرتبكة))

ابوالريم : (بسخرية) مبارك .. هذا ابوك الرابع ..

مبارك : هذا ما اعرفه .. (يقترب من فتون) من انت؟؟

فتون : (تهمس لمبارك بارتباك) انا فتون .. صديقة الريم .. الريم ما كلمتك .. ما قالت لك على الخطه اللي اتفقنا عليها.

مبارك : هي قالت لي ان اتفقوا على خطه .. بس ما اعرف شنهي الخطه.

فتون : الريم عطنتني شسنة فيها ملابس ابوها وفيها مكياج .. وقالت لي انتكر واجي على اني ابوك واخطبها لك ..

عباس : انت بعد ابومبارك؟؟

فتون : اي .. انا بومبارك..

عباس : اتصدق حتى انا بومبارك

عثمان : وانا بعد ابو مبارك ..

عباس : على قولة المسلات ... يخلق من الابهات اربعين ..

فتون : (بخوف) هذول ابهاتك..

عثمان : ماتخاف يا بومبارك .. احنا متفقين على كل شي .. وموزعين المهام .. وانت اكيد لك دور مهم .. يعني ماتخاف مهمتك ومسؤوليتك كأب موجودة..

عباس : (يشرح موضحا) يا بومبارك الرابع .. يعني عثمان شريكتي قصده يقولك كل واحد حقوقه محفوظ .. ومثل ما يقولون حقوق الطبخ محفوظة.

((صوت جرس الباب))

بوالريم : (بضيق لمبارك) اكيد هذا الابو الخامس .. انا خلاص تعبت من كثر ما استقبل ابهاتك..

ما فيني شدة اروح افتح الباب .. روح جيب ابوك اللي عند الباب وتعال.. او قول حق ابوك الليديد خلاص مانبي اليوم عندنا وايد

((يغادر مبارك باتجاه باب المنزل))

- بوالريم : ((ينظر للجميع)) الحين لو اتصل بالشرطة وابلغ عنكم شيصير ..
- عثمان : دابر تبلغ عنا ؟؟ .. ليش يابوالريم .. عملنا لك شنو؟؟
- بوالريم : هذا اسمه نصب واحتيال ..
- عباس : يابوالريم .. احنا جايين علشان زواج .. يعني علشان نسوي خير ..
- بوالريم : خير طل بوجهك .. اصبروا .. انتوا حسابكم معاي عسير .. انظروا اهني محد يتحرك فيكم ..
- عثمان : بدري يابوالريم .. وين رايح يازول ؟
- بوالريم : انثر مكانك .. رايح اجيب الشوزن .. ((يغادر))
- فتون : (بخوف) انا مالي خص .. مالي خص.. يقول بيحبيب الشوزن..
- عثمان : يعني ايه الشوزن ..
- فتون : يعني التقق..
- عثمان : يعني انا فهمت الشوزن علشان افهم التقق
- ((يدخل مبارك ومعه جل كبير في السن "جابر" يكاد لا يقوى على الحركة ومعه حقيبة))
- عثمان : منهو الزول ده؟؟
- عباس : اكيد هذا بعد مسوي روحه ابوك
- مبارك : ما اعرفه منهو .. قالي جاي يبي يقابل بوالريم ((يدخل خلف))
- خلف : اخ .. اخ يابطني .. (لمبارك) ما ادري عمك اشمعطيني ..
- ((يدخل بوالريم ومعه البندقية ، جميعهم يرتعون))
- عباس : خير يابوالريم .. لاتطول السلاح وهي قصير..
- بوالريم : (ينظر لجابر) منهو هذا بعد؟؟ .. ((لمبارك)) ابوك؟؟
- مبارك : (بخوف) لا .. ما اعرفه .. مهب ابوي.. هذا بيبك انت..
- بوالريم : ((لجابر)) من انت؟؟
- جابر : انا التاجر جابر دولار .. جايك من طرف ام خميس الخطابة .. جاي اخطب بنتك واللي تامر فيه انا حاضر .. وفلوسي كاش..



رؤية عالمية بهوية وطنية

A Global Vision of National Identity

29

((يصوب البندقية للأعلى ويطلق عدة طلقات فرحا ، بينما كل الموجودين يسقطون على الأرض بما فيهم جابر))
((

اظلام

نهاية الفصل الاول

الفصل الثاني / المشهد الاول

سوق تقليدي ، المحلات حديثة وجميع المحلات تقريبا هي محلات نسائية ، محل عبايات ، محل اكسسوارات نسائية ومكياج ، ملابس نسائية حديثة وغيرها ، وفي طرف المسرح هناك مقهى "كوفي شوب" ، حركة عامة بسيطة واعتيادية في السوق ، بعد فترة يظهر رجل اربعيني قصير (حسين) يقطع المسرح يبحث عن شيء ما وهو في توتر وقلق ، يقابله شاب ثلاثيني (ناصر).

المنظر :

- ناصر : خير يااخو .. عسى ماشر
- حسين : مضيع زوجتي؟ ..
- ناصر : المفروض اتخلي ايدك في ايدها مثل اليهال .. عيل الله يهداك .. حرمه في السوق اتفج ايدك عنها؟
- حسين : انا ماشي وراها .. لاحقها من مكان لمكان .. كاني رادار متحرك .. وفجأة التفت .. في ثواني اختفت .. اشلون ما ادري .. اتقول الارض انشقت وابلعتها.
- ناصر : زين .. اهدى وقولي مواصفاتها.
- حسين : (بانزعاج) مواصفاتها؟ .. اشلون تسألني عن مواصفاتها؟؟ ..
- ناصر : انا اسف ياخوي لاتزعل مني ... بس قصدي ابي اساعدك!
- حسين : (ببكائية) ياخوي انا لو اعرف مواصفاتها جان قلت لك..
- ناصر : ليش انت توك متزوج؟
- حسين : لا متزوجين من خمستشر سنه .. بس للحين ماشفتها عدل .. مرة شفتها في صورة ملتقطينها لها من الفضاء .
- ناصر : خمستشر سنة وماشفتها ؟! .. وعندكم عيال؟
- حسين : لا .. ماعدنا عيال ..
- ناصر : الله يرزقك ان شاء الله .. لا تيأس .. ترى انا تميت ثلاث سنوات بدون عيال .. والحمدلله من ست شهور الله رزقنا بولد..
- حسين : خلنا من العيال الحين .. خل اروح ادورها .. انا زوجتي تتشاف من بعيد على بعد عشرين كيلو .. اشلون اختفت .. اكيد الارض انشقت وابلعتها

- ناصر : زين يعني تذكر ملامحها .. قلبي هي تشبه من ؟
- حسين : تبي تعرف هي تشبه من .. من الريايل والا الحريم؟
- ناصر : (باستغراب) ها؟؟؟
- ((تدخل الزوجة ندى وهي امرأة طويلة جدا ، تبحث عن زوجها ، يلحقها ناصر فيعلق بذهول))
- ناصر : ((ينظر باتجاه الزوجة)) الله شنو هالصاروخ اللي دش علينا..
- حسين : ((ينبطح ارضا بخوف دون ان يلح الزوجة)) انبطح .. انبطح ..
- ندى : (تتادي) حسين .. يا حسين وينك ..
- حسين : (يلتفت اليها ويسرع نحوها) انا اهني .. وينج ياندى؟! .. وين اختفتي؟؟
- ندى : (لاتسمعه وتتادي) حسين .. حسين..
- ناصر : هذي زوجتك؟؟ .. هذي اللي تقول من اشوي الارض ابلعتها.. هذي علشان الارض تبلعها يبيها
- تذكر مشروبات غازية ..
- ندى : حسين .. وينك يا حسين ..
- حسين : (يصرخ باعلى صوته) انا اهني .. انا تحت .. طالعيني ندى .. تحت ..
- ناصر : وين تسمعك .. صوتك مايوصل فوق ... الارسال مايوصل ..
- حسين : (يتجاهل ناصر) لحظة حبيبي .. لحظة بجيلج .. (يغادر المسرح)
- ((تظهر زوجة ناصر "شمه" التي تخرج من احدى المحلات وهي تحمل اكياسا ومعها سلة خاصة بقطتها السيامية ، وتقترب "شمه" من ناصر وهو لا زال ينظر للمرأة الطويلة))
- شمه : (معاتبه بلهجة حادة) ناصر .. انت مخليني اشيل الاغراض والقطوة فوقهم وانت واقف اهني
- انتطلع الحريم.
- ناصر : (ينظر لزوجته ثم ينظر لندى مقارنا في حيرة وتذمر) الصراحة لازم الواحد يشتكي.. الحين حسين معطينه عمارة .. برج عود .. وانا معطيني بيت شعبي.. وين المساواة بين المواطنين.
- شمه : (تسحب باستياء) يلا تعال نشترى اكل حق القطوة.
- ((بينما يبتعد ناصر وشمه باتجاه بعض المحلات ، يعود حسين ومعه سلم كبير ، يضعه بجانب زوجته ويتسلق ليصل الى رأسها))

حسين : (وهو يؤشر بيده) هلا .. هلا ..

الزوجة : انت وينك؟! .. وين طسيت؟؟

حسين : انا كنت تحت اناديج ماتسمعيني ..

الزوجة : ماشفتك .. يمكن تتادي وانا اتصلك .. عزيت اتصلك وتليفونك كله مغلق ..

حسين : اي حبييتي البطارية خلصت ويند.

الزوجة : زين امسك عباتي وخلصك احداي .. امش معاي .. لا تضيع

حسين : لا .. ببودج عباتج ومهب هادج .. انتي للحين ماخلصتي؟

الزوجة : خلصت .. بس ادور كحل زيتي .. مهب لاقيه.. تعال نشوف المحل هذا..

حسين : لحظة لا تتحركين انطريني احول وتمسك عباتج.

((ينزل حسين يمسك عباءة الزوجة باحكام))

حسين : (يرفع رأسه محدثا الزوجة) يلا .. شبكنا .. تحركي.

((يخرج العامل من احد المحلات ، مناديا ومعلنا عن تنزيلات))

البائع : تنزيلات .. تنزيلات... تنزيلات اخيرة..

((الزوجة تنطلق بسرعة راكضه صوب محل التنزيلات ، وهي تجر حسين الذي يسقط متدحرجا على الارض اثر اندفاعها وركضها المفاجئ ، يدخل جابر ويصطدم في حسين خلال تدحرجه))

جابر : سلامات .. سلامات .. اشصار

حسين : (يقف متحاملا على نفسه) حادث بسيط وماكنت رابط حزام الامان..

((حسين يتابع طريقه مسرعا نحو زوجته ، بينما جابر يلتف الى المدخل الذي دخل منه ، ناظرا عروسه وهو يخاطبها ويستعجلها))

جابر : (يتذمر) يايبه امشي .. تحركي .. كل دكان توقفين عنده ساعتين .. ماينخلص جذيه .. يلا ييه

.. اشفيج واقفة .. تحركي .. ترى مافيني شدة على الوقفة..

((تدخل فتون وهي ضاحكة ومنزعجة معها بعض الاكياس الفخمة))

فتون : اوووف .. حبيبي جابر .. اشدعوة .. مايصير جذي .. كل محل اوقف عنده اشوي تقولي امشي

.. تحركي.. قول بخلان علي وماتبيني اشترى شي..

- جابر : يا بعد عمري مهب بخل .. اشترى السوق كله ولا يهجم شي .. بس تعبت .. أنا ما فيني شدة على الدوارة..
- فتون : (بامتعاض) خلاص .. خل ما ابي اشترى ولا ابي اجهز حق العرس ..
- جابر : لا عاد كلشي ولا زعلج .. امري لله .. بس عاد فتون .. الله يخليج استعجلي ..
- ((فتون تلمح شمه وهي تعبر حاملة سلة القطة بينما خلفها ناصر يحمل الاكياس))
- فتون : الله القطة تجنن .. جبوري شوفها تجنن .. كيوت..
- شمه : اعجبتي القطة ..
- فتون : اي .. ترى ما احسدها .. الله يخليها لج .. تتربى في عزج
- جابر : شنو تتربى في عزج .. قطة هذي..
- فتون : (بالحاح ودلع) جبوري .. تكفى .. الله يخليك .. ابي مثلها ..
- ناصر : (ساخرا) انتي تدرين هالقطة بكم .. عبالج رخيصة .. هذي قطة عندها جواز
- شمه : (بتفاخر) اي هالقطة من استراليا .. ماخذينها بخمسين الف دولار..
- فتون : تبيعونها؟؟
- ناصر : سمعتي زوجتي .. تقولج ماخذينها بخمسين الف دولار..
- جابر : (بتحدي واستخفاف) وانت سمعت زوجتي ... اتقولك .. تبيعونها..
- شمه : (بتوتر) اي بنبيعها .. بنبيعها .. بستين الف .. لا بسبعين الف .. واذا تبونها مع الجواز بمية الف دولار
- جابر : (يخرج من جيبه دفتر الشيكات ويحرر شيك) خذ شيكك .. (لفتون) حبيبي يلا خذي منهم قطوتج .. (فتون تأخذ القطة بفرح)
- ((جابر وفتون يتحركان ويدخلان الى احد المحلات ، ناصر وشمه يتابعان جولتهما في السوق، بينما تدخل الريم التي تتلفت الى المحلات بانبهار ومعها مبارك الذي يحمل بعض الاكياس الفاخرة وهو في ارتباك ومتوتر ويشعر بالاحراج)).
- مبارك : ها .. حبيبي .. اش باقي بعد ما جنبناه؟
- الريم : ما ادري يا مبارك .. احاول اتذكر .. خل ادور براحتي ..

- مبارك : الريم .. لا تتسبن احنا متفقين ناخذ الاشياء الضرورية .. ترى حبيبتي فلوس السلفية قربت تخلص ..
- الريم : اشدعوة .. قربت تخلص واحنا ماخذنا شي ..
- مبارك : انتي تدرين كم صارفين في هاللفة هذي .. امية وخمسين الف ..
- الريم : (بانزعاج) يعني مني .. شاسويك كل شي غالي ... انت بروحك شايف..
- ((الريم تتجه الى محل العبايات ويلحق بها مبارك ، بينما يظهر لها البائع من داخل المحل))
- البائع : (لبناني او من اي جنسية عربية) اهلا وسهلا .. نور المحل والسوق كله.. تفضلوا عاملين تنزيلات بالمحل .. تنزيلات ٦٠ %
- الريم : بكم هذي العباية ؟؟
- البائع : هذي مشانك .. بست الاف وخمسمية ..
- مبارك : اشدعوة بست الاف وخمس مفضلينها من جلد تمساح..
- البائع : هذي العباية ماركة "جدتي" ماركة فرنسية مشهورة ..
- الريم : (بامتعاض لمبارك) انت تبي تفشلنا ... يقولك ماركة .. هذي اسعار الماركات
- مبارك : زين اسأليه عنده ماركة سوق الخميس والجمعه ..
- الريم : (تلتقط عباءة اخرى) وهذي بكم
- البائع : هيدي بعد التنزيلات باحد عشر الف .. ماركة سويسرية اسمها "هلا بالخميس"
- ((الريم ومبارك يواصلان حوارهما مع البائع ، بينما تدخل ندى مع زوجها حسين))
- حسين : (يستوقف زوجته وهو يشدها) لحظة .. لحظة ياندى .. وقفي جربي هالكحل ..
- ندى : (تلتفت اليه) ما اسمعك .. وش تقول؟
- ((حسين يخرج جواله ويجري اتصال ، ندى تمسك جوالها وترد))
- حسين : الوا .. ندى .. ييه صار لي ساعة انا ديج علشان تجربين هالكحل ..
- ندى : وينه .. هاته .. خل اجره اشوف ...
- حسين : بتجربينه .. زين لحظة انطري ...

((حسين يأتي بالدرج ويصعد حتى يصل الى زوجته ويناولها اياه ، تقوم بتجربته))

ندى : لا مهب زين .. شوفلي غيره .. قوله ابي زيتي ..

((حسين ينزل الدرج ويتجه الى المحل ويأخذ كحل اخر ثم يعود ويصعد الدرج لزوجته))

ندى : لا لا .. هذا كأنه ماي .. رجعه .. قايلتك .. زيتي .. زيتي ..

((حسين ينزل الدرج ويتجه الى المحل ويأخذ كحل اخر ثم يعود ويصعد الدرج لزوجته من جديد ويكرر ذلك مرارا وتكرارا

ويزداد تعب تدريجيا ، بينما البائع يعطي كيس للريم))

البائع : الف مبروك .. ملبوس الهنا ..

الريم : (تاخذ الكيس ، ثم تلتفت الى مبارك) مشكور حبيبي على العباية .. بس حظ في بالك يعني ببيلي

ست عبايات بعد ..

مبارك : ست عبايات؟! .. بعد بأحد عشر الف ..

الريم : لالا .. بعد انا مهب مسرفة .. بناخذهم بو الفين وثلاث الاف ..

مبارك : الريم .. ترى ورانا مصاريف عرس .. في قاعة .. في اكل .. في بلاوي ورانا .. وخلف توه مكلمني

راح اتفق مع الفرقة ومواعده يجيني اهني ياخذ العربون .

((يخرج جابر وفتون من المحل الذي دخلا اليه ، يشعر جابر بالتعب))

جابر : فتون .. انا خلاص تعبت .. مب قادر اكمل ..

فتون : (بانزعاج وضيق) جابر .. احنا تونا داشين السوق ماشرينا شي

جابر : فتون .. خذي هذا كرت البنك (يناولها الكرت) روجي واشتري اللي تبينه .. اي شي تبينه خذيه ولا

تخليين شي في خاطرج ولا تقصرين على روجج .

فتون : اوكي .. انطري اهني .. واتحمل اتطالع الحريم في السوق .. ترى اثار

جابر : (بيتسم) فديتهم اللي يغارون .. (يناولها بطاقة البنك) .

فتون : (تاخذ منه البطاقة) مهب متاخرة .. بروح اشوف محلات المجوهرات .

جابر : اشتري اللي تبينه .. لو تبين حتى تلبسين ذهب من راسج لي ريولج

ندى : (معلقة لزوجها وهو فوق السلم) سمعت شيقولها .. سمعت .. بيايسها ذهب من راسها لين ريلها ..

- حسين : ياندى .. انتي علشان البسج ذهب من راسج لين ريلج .. ببيلج ميزانية دولة .. اذا تيين البسج شينكو ترى حاضر ..
- ((الريم ومبارك يتقابلان مع فتون وجابر ، بينما فتون والريم يسلمان على بعضهما بحرارة ، مبارك وجابر ينظران لبعضهما باستياء واستحقار))
- الريم : فتون .. هلا حبيبتي
- فتون : هلا الريم .. اشلونج يا حياتي .. (لزوجها) جابر .. هذي صديقتي الريم .. وهذا خطيبها مبارك .. اكيد تعرفه ..
- جابر : (باستحقار) هلا هلا
- مبارك : (باستحقار) هلا .. هلا ..
- الريم : من متى في السوق ؟
- فتون : توني ما صار لي خمس دقائق .. وانتي
- الريم : انا ثلاث دقائق ونص بس ..
- مبارك : اي ثلاث دقائق ونص .. قصدج ثلاث ساعات ونص.
- فتون : راويني شنو اشتريتي ؟؟
- الريم : (بارتباك) بعدين .. في البيت .. تعالي وبرويج
- مبارك : (معلقا بسخرية) ما اظن وحدة فيكم بتروي الثانية اللي اشتريته.
- الريم : وانتي شنو اشتريتي ؟؟
- فتون : (بارتباك) للحين ماشرينا شي .. (بتفاخر وكأنها تغيظ صاحبها) بس جابر حبيبي .. توى مشترى لي هالقطو بامية الف دولار ..
- الريم : (تكز على اسنانها هامسة لمبارك) سامع شاري لها قطو بامية الف دولار ..
- مبارك : (يهمس لها معلقا) زين قولي لهم مايشتروني انا بامية الف دولار .. اصير لهم قطو .. واصيد لهم فيران بيتهم وفريجهم
- جابر : فتون روي رفيجتج الساعة الي شريتها من اشوي
- فتون : (بتفاخر) بعدين برويها .. حبيبي جابر اشتريتي ساعة بميتين وخمسين الف.

- الريم : (تهمس لمبارك بقهر) سامع .. شاري لها ساعة بميتين وخمسين ألف .. وانت مستكثر علي عباية باحد عشر الف.
- مبارك : (بضيق وقهر يهمس لها) عاد لا يهايط وينافخ علينا هذا .. حتى انا ساعتني بميتين وخمسين .. بس بدون الف .
- فتون : الريم .. جابر تعبان اشوي .. اشرايح نروح نكمل ونتشري اغراضنا مع بعض وخذ الريايل ينطرونا اهني.
- الريم : ها!! .. ما ادري .. اشرايك يامبارك؟؟
- جابر : (مشجعا) خل يروحون وتعال نجلس ننظر اهني.. انا عطيت فتون بطاقتي .. وانت عطتها بطاقة البنك وخلصهم يشترن اللي بيونه .
- ((مبارك بتوتر ، يخرج البطاقة ويناولها للريم ، فتون والريم تنطلقان معا ، بينما جابر ومبارك ياخذ الاكياس منهما ويجلسان على احدى الطاولات في المقهى))
- حسين : (وهو ينزل السلالم يلهث) خلاص تعبت .. المفروض اركب اصانصير .. احنا تونا في الكحل .. للحين باقي المسكرة والروح ((يرن جواله ويرد))
- ندى : ((تتحدث بالتليفون)) اشفيك واقف عندك .. تحرك يارياي .. تعبت من الوقفة وانا انظر هالكحل ..
- حسين : الحين جربتني خمسين كحل لا واحد اعجبج ..
- ندى : لا ما اعجبوني .. مهب على لون عيوني .. خلص .. ادري فيك انت اتدور الرخيص .. شوفي كحل عدل بالزطي.. كحل ماركة.
- ((يتجه حسين بيأس وضيق الى المحل ويختفي داخل المحل ، يدخل ناصر منهارا وهو يحمل الاكياس ومعه زوجته شمه التي تبكي بقهر))
- ناصر : اهدي ياشمه بئلقاه .. لا تصيحين خليني اركز .. اتذكر وين ضيعناه
- شمه : (تبكي) اشلون اختي .. اشلون ماحسيت .. اشلون ضاع ؟
- ناصر : اقول يمكن كنتي حاطته في السلة مالت القطو اللي بعناه..
- شمه : ما ادري .. ما ادري ياناصر .. او يمكن نسيته في محل من المحلات..
- حسين : (يخرج من المحل ومعه الكحل ويقترب منهما) اشعليه اتدورون؟؟

- ناصر : ولدي .. ولدي ضايح .. مهب لاقينه ..
- حسين : ولدك الياهل ابو ست شهور؟
- ناصر : اي .. اي ياخوي .. ما ادري ضاع .. ما ادري ناسينه في محل؟
- شمه : انا بروج ادور البنية والقطو .. يمكن في السلة..
- ناصر : وانا بروج ادوره في المحلات اللي دخلناها.
- ((شمه تغادر المسرح ، بينما ناصر يبدو محتارا في الاغراض التي معه))
- ناصر : اخوي .. ممكن اتخلي هالاغراض عندك لين ادور ولدي..
- حسين : اي روح .. معلية .. هات الاغراض.
- ((حسين يأخذ منه الاكياس ، ويسرع ناصر بالتوجه الى احد المحلات ، بينما حسين يحمل الاغراض ويضعها بجانب السلم ، ويهم بصعود السلم ثم يتراجع))
- حسين : (يتوقف مستدركا) ليش ما اجره انا قبل لا هي تجربه..
- ((يجرب الكحل ويمسح عينيه ، ويشعر بضبابية))
- حسين : (يصرخ) عيوني .. ما اشوف شي .. عيوني .. (يجلس بين الاكياس)
- ((حسين يخط في الاكياس ، ثم نسمع صوت بكاء طفل ، يتحسس حسين الاكياس ، ويخرج الطفل الرضيع من داخل الكيس))
- حسين : هذا قاط ولده في الكيس .. وناس تدفع فلوس علشان يصير عندها ولد.
- ((حسين يقبل الطفل ويحاول اسكاته وهو يغمض عينيه بحزن ، ثم يفتح عينيه))
- حسين : (بفرح) صرت اشوف .. اشوف .. اي اشوف
- ((يخرج ناصر من المحل ، ويستدل على صوت الطفل ويسرع نحو حسين ويلتقط منه الطفل))
- ناصر : ولدي .. ولدي حبيبي..
- حسين : خذ ولدك بيه وروح .. وبدال لا تحطونه في كيس .. حطه في حضنك .. احنا بحاجة لها العيال يكبرون في حضنا .. مهب في اكياس ..
- ((ناصر يغادر ومعه طفله والاكياس ، حسين يجري اتصال في زوجته))
- حسين : ندى .. يلا نمشي .. محلات الكحل بندو خلاص ..

ندى : (تتحدث في الهاتف) زين شوف لي مشط .. وهاته لي فوق اجره..

حسين : شنو؟؟ .. مشط .. لا .. انا بروح خلاص .. مع السلامة

((حسين يغادر كأنه هارب وندى تلحقه))

ندى : حسين .. حسين .. وقف يا حسين .. وقف .. (تغادر)

((مبارك يفز من مكانه وهو يرتعش))

جابر : خير خير .. اقرصج شي؟

مبارك : لا .. هذا مسج البنك (ينظر للمسج) اوووبا .. خمستعشر الف..

جابر : (يضحك ساخرا) بيه احنا في سوق .. ماعليك الا تدفع وبس .. توقف تدفع .. تقعد تدفع ..

تمشي تدفع .. حتى لو بتتنفس بتدفع ..

مبارك : (يجلس بحسرة وضيق) بس تعبت وانا ادفع .. دفعت وايد وللحين في اشياء وايد جدام لازم تدفع..

جابر : كم دفعت؟؟

مبارك : انا ماخذ قرض من البنك مليونين.. مابقي لي منها غير ميتين وخمسين الف

جابر : (يضحك) هذي قيمة الساعة اللي شريتها حق فتون من اشوي ..

مبارك : ساعة فيها ثلاث عقارب يركضون ورا بعض .. يحسبون علينا الزمن والعمر .. ربع مليون علشان هالعقارب ..

جابر : اي بس هذي عقارب ذهب ..

مبارك : ماتفرق يا جابر .. الزمن عند كل العقارب واحد..

جابر : الناس بيشوفون العقارب الذهب .. ولا بياخذون بالهم من الزمن.. بيشوفون الساعة اللي تلمع في

ايدك كم تسوي .. (مستدركا) انت توك شاب .. وبتركض مثل عقارب الساعة .. لان كل شي حولك يركض .. بس انت مابتكون مثل العقارب ولا راح تعجب احد .. الا اذا صرت تلمع.

مبارك : (بتهمك وسخرية) يعني انت الحين تلمع ؟

جابر : اسأل بطاقة البنك .. او ممكن تسأل هالقطوة بو امية الف دولار .. بتجاوبك.

مبارك : (يفز من مكانه مرتعشا وهو يتناول تليفون وينظر له) وبعدين .. اوف .. ثلاثين الف .. وش
شاريه هذي؟ ..

((جابر يضحك وهو ينظر لمبارك الذي يحتقره))

مبارك : اي اضحك اشعليه .. انت ماتجيك رسايل مثلي .. فتون موفرة عليك

جابر : انت تجيك رسايل .. بس أنا البنك كله يجيني ..

((يقترب شاب بلباس مهندس من جابر))

الشاب : سعادة الفاضل العميل جابر .. لو تكرمتم تم خصم ميتين الف من رصيدكم ..

جابر : حتى البنوك والمصارف .. تعرف قدرك .. انت لين دشيت البنك تاخذ سلفية خذت رقم ونطرت كم
يوم لي البنك يوافقك على السلفية صح؟

مبارك : اي صح ..

جابر : (يلتفت الى الشاب) نزل في حسابي خمسين مليون .. على الحساب

((الموظف يضرب على جهاز الجوال الخاص به))

مبارك : سعادة الفاضل العميل جابر .. بعد تكرمكم علينا .. نزلنا في حسابك خمسين مليون على
المكشوف وبدون فوائد ..

((مبارك يهز مع جواله ويفز واقفا في غضب))

مبارك : لا .. هذي مصختها .. السلفية بتطير جزي .. ورانا عرس .. قاعة وطاقات.

جابر : تاخذ شيك وتروح

مبارك : (باستغراب واستفهام) شنو ؟

جابر : خذ شيك بالمليونين وروح .. الحق عمرك وسدد سلفيتك .. بدال لاتصير انت مرهون للبنك
ومرهون للزوجة والعيال .. ويتم طول عمرك مرهون..

مبارك : (بانفعال) انت من صجك ؟؟! .. اكيد مهب صاحي .. خرفت انت؟

جابر : انت تدري اني كنت جاي ابي اتزوجها ذاك اليوم اللي كنت جاي ربيعك وجاي تخطبها .. ولو

هي ما اطلعت قدام الكل وسوت الفيلم .. وقالت بتدبح روحها جان ابوها وافق وزوجني اياها ..

مبارك : اي بس انت طلبت فتون .. وهي وافقت

جابر : انا تاجر وما احب ادش مزاد واطلع فاضي .. لين شفت المسالفة جذي .. قلت اخذ فتون .. تدري .. مشكلة الفقاري .. انهم يدشون المزاد ويحطون راسهم براسنا .. بيون يشترون سيارات و يلبسون ماركات مثلنا .. غلطانين اذا بيون يتساوون معنا .. احنا فلوسنا ملكنا حلالنا .. بس فلوسكم انتوا قروض..

((الريم وفتون يظهران امام احدى المحلات وهما واقفتان مع البائع))

فتون : عطني قطعتين ..
الريم : وانا بعد عطني قطعتين
فتون : (ترمق الريم بنظرة ، ثم تلتفت الى البائع) انا عطني ثلاث
الريم : (بتحدي) انا عطني اربع ...
فتون : (بغيط وتحدي) انا ابي عشر .. عشر قطع
الريم : انا ابي عشرين ..

((يفز مبارك بانفعال اثر هزة الجوال))

مبارك : يه يه .. مايصير ياناس .. حرام ياناس .. ستين الف .. لا جذي ما اتحمل.

((مبارك يتلفت ويلمح الريم واقفة عن الحل يركض نحوها))

مبارك : الريم .. انتي اشماخذه بستين الف .. ذهب؟؟
الريم : لا حبيبي ماخذه فستان..
مبارك : فستان بخمسين الف ..

الريم : لا .. رخيص .. الفستان الواحد بالفين .. خذت منه ثلاثين حبة .. عيل تبني اخلي فتون تاخذ ثلاثين حبة وانا لا..

((مبارك مصدوما ويتسمر مكانه وهو في حالة ذهول ، بينما الريم تتركه وتتابع جولة التسوق مع فتون ، ثم يدخل خلف ويقترب منه مناديا))

خلف : مبارك .. مبارك ... بروك
مبارك : (ينتبه ويفيق من حالته) خلف .. زين اللي جيت .. انقذني ياخلف ..
خلف : اشصاير؟؟

- مبارك : (يسحبه) تعال بسرعة خل نلحق البطاقة ...
- خلف : اي بطاقة .. شالسالة ..
- مبارك : بطاقتي .. بطاقتي مع الريم .. وكل اشوي اتشخطها بالالوفات .. بتروح الفلوس .. فلوس السلفية بتضيع وبعدي ماتزوجت
- خلف : (بتشكك وتحذري) بروك .. ليكون هذا فيلم مسوي علي علشان توهمني مع الفرقة وتخليني ادفع .. انا توني مخلص ومتفق معاهم وجاي اخذ العربون
- مبارك : (يهتز مبارك ويسحب جواله بسرعة وينظر له) ما اظن في عربون ياخلف..
- خلف : اشلون يعني .. والطقات من بيدفع لهم .. انا اتفقت معاهم خلاص .. ترى عليهم طلب والحجز بيروح علينا اذا مالحقنا عليها.
- مبارك : انت اللي الحق علي وتعال معاي نوقف الشفط ..
- ((يهم مبارك بسحب خلف ، لكنه يرتعش على اثر رسالة في جواله ، ينظر للرسالة ثم يجلس على الارض في حسرة))
- مبارك : (يندب حظه) خلاص .. خلاص ياخلف .. الرصيد راح ..
- خلف : معليه مايخالف اجيب لك كرت تعبئة ..
- مبارك : الرصيد راح خلاص .. مافي رصيد ياخلف ..
- خلف : مهيب لو ماخذ فاتورة احسنك .. تبي احولك رصيد من عندي..
- ((الريم وفتون تخرجان من احد المحلات غاضبة ، الريم تتجه الى مبارك غاضبة ، بينما فتون تتجه الى صوب جابر وهي سعيدة))
- الريم : (ترمي له البطاقة) رصيدك مافي شي .. فشلتني
- خلف : انا قايله اشحن .. كل مرة اقوله يشحن مايسمع الكلام
- مبارك : (وهو على الارض يندب حظه بقهر) شاحن بمليونين .. مليونين ياجماعة .. بسددهم في عشر سنين .. (يردد) عشر سنين بتم مرهون ..
- ((يقف مبارك بتثاقل وهو في طريقة لمغادرة المسرح بخطوات بطيئه وهو يردد جملته الاخيرة))
- الريم : (تلحقه بانفعال وهي تهرق افعالها) يعني فتون احسن مني .. ليش ؟؟ .. البنات اللي يشترتون ماركات ويصرفون احسن مني في شنو ؟ ..

((يغادر مبارك المسرح ، بينما هي تبقى واقفة في بقعة وكأنها تتابع حديثها اليه))

الريم : (بهدهوء وثم تتصاعد بانفعالها) بنات يشترون اجنات بثلاثين الف وانا شاربه شنطه بعشرة الاف .. هم احسن مني في شنو.. منيرة اشترت مكياج بخمس وعشرين الف .. انا بس بعشرين .. ليش؟! .. هي احسن مني في شنو .. فتون اشترت ساعة بميتين وخمسين الف .. وانا ساعتني بس بسبعة الاف .. قطوة فتون بامية الف دولار .. وانا حتى عصافير الحب بو امية ماعندي .. الناس احسن منا في شنو .. ليش مانعيش حالنا حال الناس .. انا ماطلبت اعيش عيشة الملوك والسلاطين .. بس ابي اعيش عيشة الناس اللي حولي .. ابسط حقوقي اني اعيش عيشة الناس اللي حولنا وفي مجتمعنا.. بس.

اظلام

مبارك والشمس
صالحه ثم انا في شنو
عبد الله وندى في شنو

الفصل الثاني / المشهد الثاني

المنظر : ((قاعة افراح ، يظهر مدخل القاعة في جزء مقطعي عند احد طرفي المسرح ، بعض النساء المعزومات

تجلسن في الصالة بينما الفرقة الشعبية تستعد بالطبول والطيران ، وعند المدخل يقف خلف متنكرا بزي

امراة يلبس العباءة والبطولة لاسقبال الضيوف النساء اللواتي تقفن عند المدخل عند جهاز التفتيش وامامه

تقف فتون مع صديقتها منيرة))

المرأة / : (عند المدخل يستقبل بعض النسوة المعازيم) اختي .. لحظة .. وبين مردعة جذي .. اشدعوة بوابة

خلف بلا بواب ..

فتون : اني مهيب فتشتيني خلاص.

خلف : اي خلصنا التفتيش .. باقي الاستجواب

فتون : (باستكار) اي استجواب؟؟

خلف : قوليلي .. انتي من المعازيم والا من جاية اتدورين اكل بس.

فتون : انا من المعازيم .. معزومة .. (تخرج الدعوة) وهذي الدعوة ..

خلف : اي درجة ؟ .. طالعي الدعوة اللي عندج .. اشمكتوب فيها .. الدرجة الاولى والا البنزس والا السياحية

..

فتون : (تنظر للكرت في يدها باستغراب) مكتوب الدرجة الاولى ..

خلف : عيل يلا هاتي .. ادفعي الف رسوم الدخول..

فتون : (باستكار) اشحقه؟؟

خلف : ياوخيتي المعرس عليه سلفيه ثلاثة مليون .. وبابع سيارته امس وبيجي العرس اليوم في كروة .. بعد

تبيه يسوي عرسه ببلاش ..

فتون : بس انا صديقه العروس .. ومعزومة ..

خلف : معزومة يعني تبين اتدشين ببلاش.. تروحون حفلات تسمعون اغاني وترقصون وتدفعون قيمة التذكرة

والااكل .. اشمعني العرس ماتون تدفعون .. عندنا اغاني وطققة واكل بعد .. يلا .. دفعوا .. زمن

بوبلاش راح..

منيرة : (معترضه تحدث فتون) فتون .. امشي خل نرجع

فتون : (باحراج) لا منيره .. فشيلة نرجع .. تبين نطلع جدام الناس يقولون اطردهم .. او ماعندهم بيزات يدفعون

((فتون تدفع مضطرة ومكرهه))

((خلف يقبض منها النقود ويسمح لها بالدخول ، وتتوقف فتون قرب المدخل بانتظار صديقته منيره التي يستقبلها
((خلف))

خلف : اكيد مثل رفيجتج معزومة درجة أولى ..

منيره : (بمكر ونباهه) لا انا مهيب معزومة ..

خلف : مهيب معزومة ؟؟! .. يعني جايه اتدورين اكل وبس.

منيره : اي جايه حق الاكل

خلف : دفعي خمسين بس.

فتون : (باعتراض) اشحقه هي تدفع خمسين وانا المعزومة دفعيني الف.

خلف : هي بتدفع خمسين لانها جاية تاكل بس .. اما انتي عندج امتيازات .. بتاكلين وتجلسين على كرسي

وطاولة وتسمعين اغاني وطققة .. وترقصين وتتنقدين وتتنززين على فلانه وفلانه .. بس تصوير ..

لا .. ممنوع .. اذا تبين مع تصوير .. بنحولج الدعوة (VIP) وتدفعين خمسمية زيادة فوق اللي دفعتيه.

((منيره تدفع وتدخل مع فتون ، بينما خلف يتابع مهمته مع الاخريات ، يقترب منه "عباس" متكررا في زي "امرأة" ويبدو

مرتبك وهو قادم من صوب القاعة ، يسحب خلف وياخذه جانبا على انفراد))

خلف : (بانزعاج وضيق) اشتبين .. اشفيج ساحبتني جدي؟

المرأة/ : (يرفع البرقع معترضا) خلف .. طالعيني زين انا عباس..

عباس

خلف : ادري انك عباس بس لازم بنتعامل على ان حريم علشان نتعود ومحد يكشفنا

عباس : صحيح .. والله انك خطاط .. خلف انا متوهقه .. النسونات مسندريني بيوني اطق طبولات .. وانا

متوهق ما اعرف اغني ولا اطق طبولات..

خلف : انا اللي بغني .. انت خلك حق النقوط .. جمع النقوط بس..

((عثمان المتكر بري امرأة هو الاخر يدور بين النساء اللواتي يرتدين عباءة وبطولة ويسألهن))

عثمان : (يقترب من عجوز) انتي خلف؟

العجوز : خلف في عينج باللي ماتستحين .. شايفه اشني طالع من ورا البطولة؟

عثمان : (بارتباك وهو يبتعد) انا اسف ياخاله .. اسف

((عثمان يقترب من سيده "عجوز" اخرى معاها عكاز وينظر لها عثمان متفحفا ، تتضايق العجوز وترفع العكاز وتهتم

بضره، فيهرب من امامه، متجها نحو المدخل، بقرب عباس وخلف))

عثمان : ورطة ورطنا فيها مبارك .. هسه كيف الاقيهم دول .. خمسين وحدة لابسين عباية وبطولة .. كيف اعرف خلف والا عباس من بين دول؟

((عثمان يقف في حيرة وهو يفكر حتى يقترب اكثر من خلف وعباس اللذان في مكانهما يتحاوران صامتا ، فتلمح فكرة في ذهن عثمان))

عثمان : ايوه لقيتها ((يصيح بقوة كأنه في الغابة صيحة طرزان))

((جميع الحاضرات تنتبهن لعثمان باستغراب وهن تسرعن نحوه ، فيسرع خلف وعباس معهن))

خلف : (يمسك عثمان وهو متوتر موضحا للحضور) الظاهر زيرت ..

العجوز : (تعلق) انا من شفتها قلت يا حبيب .. يازيران ..

فتون : اشدعوة زيرت قبل الطق ..

عباس : هذا زيرانه على الريحه .. او يمكن زيرانه يصخن قبل الطق ..

((تنفض النساء من حول عثمان ويبقى فقط عباس وخلف))

خلف : اشفيك بغيت تفضحنا

عثمان : صار لي ساعة بدور عليكم بين النسوان.

عباس : اي انا بعد قبل اشوي كنت ادور عليك بين النسوانات .. مريت عليهم حبه حبه ما لقيتك .. انت وين كنت مخشوشه؟

عثمان : كنت بصخن الطيران والطبول ..

عباس : خلف .. نبي نشوف حل علشان نعرف بعض وما نضيع .. دور فكرة زين .. انا بحط ريشه فوق راسي .. (يخرج ريشه ويثبتها فوق رأسه)

نلبس كوت فوق العباية ..

خلف : وانا بلبس كوت فوق العباية (يخرج الكت من اسفل العباية ويلبسه فوقها)

عثمان : انا حامشي بنظام كلمة السر .. لما اقرب على واحد فيكم .. اسأله .. شنو تشرب؟ .. الزول منكم يرد علي .. يقولي اشرب عصير ..

خلف : اوكي .. اتفقنا ..

((يدخل مبارك مرتديا ثياب العرس ، يقترب منهم ضاحجا ومنفعلا))

مبارك : هيه انتوا .. انا جايكم طبلاط .. علشان تنقذوني من ورطة الفرقة .. وتوفرون علي فلوس .. مهيب جايكم توقفون تسولفون.

عباس : جذبي انت تعامل طبلاتك .. احنا جايين ببلاش وموفرين فلوسك .. على قولة المسلات .. طرار ويتشرط ..

مبارك : ادري انكم موفرين علي ... بس تكفون يالربع كملوا معروفكم .. وروحو سلوا الناس .. ترى بدوا يتمثلون.

عثمان : كيف نسليهم .. نقولهم نكت والا نسوي نفسنا مهرجين وننتطط.

مبارك : ياعثمان .. روحوا طقوا وغنوا .. يلا بسرعة قبل لا تدخل العروس .. طقوا .. بسرعة روحوا طقوا (يوصيهم وهو يغادر بسرعة)

عثمان : (في حيرة) مبارك راح قبل مايقول لنا نطق مين ؟

((خلف يسحب عثمان وعباس ويتجهون نحو المكان المخصص للفرقة ، تظهر عاملة الضيافة الفلبينية وهي تحمل صينية عليها اكواب العصير وتدور بين المعازيم ، عثمان وخلف يجهازان الطيران والطبول ، بينما يقف عباس عند طرف ساحة الرقص في حالة استعداد وانقضاء))

عباس : لازم اكون جاهز .. اول ما يقطون الفلوس اطب عليه مثل حارس المرمى.

((تقترب عاملة الضيافة الفلبينية حاملة صينية العصير نحو عباس))

العاملة : شنو تشرب ؟

عباس : عصير .. (مستدركا) انت عثمان .. عرفتك من كلمة السر مالك .. (يضحك) عثمان الله يقطع ابليسك اشلون صرت فلبينية؟ .. (العاملة مستغربة) عثمان اشفيك ماعرفتيني انا عباس .. شوفني..

((عباس يرفع البطولة عن وجهه ، فتصرخ العاملة خائفة وترمي الصينية وتهرب ، لا ينتبه احد للعاملة حيث مع هروبها يبدأ خلف وعثمان وبعض المساعدين معهما في قرع الطبول والغناء ، ثم يدخل مبارك مع عروسه الريم ، يزداد تفاعل النساء مع دخولهما ، تقوم فتون تنقط وترمي النقود فوق العروسين ، وكذلك منيرة وبعض النسوة ، بينما عباس يزحف ويجمع النقود من الارض ، الى ان يجلس العروسين على الكراسي المخصصة لهما))

خلف : (يوقف الغناء ويردد) الف الصلاة والسلام عليك يا حبيب الله محمد .. (يباب)

((يبدأ صراع النقود حيث تقترب فتون من خلف وتعطيه رزمة نقود وهي تهمس له))

خلف : يامن نقوطه .. نقوط فتون مرت جابر .. كله بياض .. (غناء)

((منيرة تقترب من خلف وتهمس له))

خلف : يامن نقوطه .. نقوط منيرة بنت الزين .. كله بياض .. (غناء)

فتون : ((تقترب من خلف)) منيرة كم نقطت ..

خلف : اظن على حسب وزن الفلوس .. اكثر منج بشوي..

فتون : (باصرار وتحدي) لا منيرة انتقط أكثر مني .. ابد ما اخلوها تنتقط أكثر مني ..
(فتون تخرج من حقيبتها رزمة نقود كبيرة وتناولها لخلف))

خلف : (يعلق كأنه معلق رياضي) للمرة الثانية على التوالي تتقدم فتون .. فتون .. تفوز بلقب صاحبة اعلى
نقاط .. تستاهل الناموس .. يامن نقاطه .. نقاط فتون مرت جابر .. وكله بياض (غناء)
منيرة : ((تتقدم نحو خلف)) حجية .. ابي ادفع أكثر من فتون .. بس الحين ما عندي كاش .. ممكن تاخذين
شيك ..

عثمان : لا .. ما بناخذ شيكات .. انا مجرب الشيكات اللي بدون رصيد ..
عباس : لا تخافين حبيبي .. مافي داعي للشيكات .. احنا طبالات خمس نجوم .. الجهاز مال البنك موجود ..
تفضلي ..

((عباس يخرج جهاز الدفع بالبطاقات من حقيبة اليد التي معه))

عباس : حظي ببطاقتك .. كم تبين تدفعين .. امية الف ..
خلف : بس ؟؟! .. فتون دافعه أكثر ..
منيرة : (لعباس) حجية اسحبي امية وخمسين الف ..
عباس : دقيقة واحد ..

منيرة : لحظة .. خالتي هذا الجهاز مال بنك اسلامي .. اي خالتي .. انا ما ابي نقوطي ماتكون مبروكة ..
ابي نقوطي فيها بركة ..

عباس : (ينظر للجهاز) لاتحائنين هذا مال كل البنوكات .. بس يوم الخميس والجمعة .. يعني وقت العروس
يصير مال بنك اسلامي .. (يناولها الجهاز) تفضلي .. دخلي رقمج السري ..

((منيرة تتعامل مع الجهاز وتدخل الرقم السري))

خلف : (يسأل عباس) ها ؟! .. بشري .. تم السحب .. اعلن عن النقاط ..

عباس : توكلي على الله .. خلاص سحبنا الفلوسات ..

خلف : (تعليق رياضي) منيرة .. منيرة .. وهي اللي تكتسح .. وتفوز باللقب .. اتدافع عن اللقب بجدارة ..
تستاهل منيرة لقب صاحبة اعلى نقاط .. يامن نقاطه .. نقاط منيرة بنت الزين .. (غناء)

((تقترب فتون منغطة ومتحدية منيرة وهي تواجهها وتخرج شيك وتقدمه لخلف))

فتون : خذي .. هذي نقوطي .. شيك بنص مليون ..

عثمان : يا اختي .. احنا ما بنقبل شيكات .. ياتدفعي كاش .. ياتطلعي البطاقة وتخطيها في الجهاز ونسحب القروشات..

فتون : ما عندي بطاقة .. البطاقة عند ريلي ..

عثمان : دي ما مشكلتنا .. اتصلي فيهو يجي ويدكي البطاقة ...

مبارك : (يقرب منهم قلقا ومستفسرا) شالسلفة يا جماعة.

خلف : لا تحاتي يمه يامبارك .. انت الحين معرس .. روح انرز يمه ولا تشيل هم

فتون : (تستجد في مبارك) مبارك .. تكفى كلمهم .. ابي انقط وما عندي كاش .. ومهب راضين ياخذون شيك

مبارك : (يعاتبهم) اشفيكم .. انتوا ماتعرفون الناس ولا تقدرولهم .. هذي فتون زوجة الملياردير جابر .. خذوا منها الشيك

عثمان : واذا الشيك طلع بدون رصيد ..

فتون : اشلون بدون رصيد .. انا زوجي الملياردير جابر ..

عثمان : عرفنا زوجك الملياردير جابر .. بس افرضي طلقك قبل مانصرف الشيك

فتون : مايقدر يطلقني .. العصمة في ايدي انا ..

مبارك : (بحدة معاتبا) انتوا اشفيكم اتحققون مع الناس .. مهب شغلكم .. انتوا طبالات مالك شغل .. خذوا منها الشيك يلا

عباس : هاتي الشيك .. انا المسؤولة راعي اموال النقوبات (ياخذ منها الشيك)

((صوت رنين جوال مبارك ، يخرج التليفون من جيبه ويرد))

مبارك : الو .. هلا اخوي .. اي انا المعرس .. خير ليش .. اشصاير؟؟ .. زين..

((مبارك ينهي المكالمة مستغربا ويتحدث الى خلف))

مبارك : قولي حق الحريم يتغطون بيدشون الامن يقولون بيشيكون على شي في القاعة

خلف : هذا وقته .. شيسون من الصبح .. جان شيكوا على القاعة ..

عثمان : (بخوف) يازول خلهم يدخلوا يشيكوا القاعة يمكن فيها قنبلة..

خلف : (يعلن في المايكروفون) يا حريم تغطوا .. تغطن .. ريايل بيدشون القاعة..

((يدخل رجال امن الفندق ومعهم العاملة الفلبينية التي تسرع وتشير الى عباس ، بينما بعض النساء من المعازيم يحيطون بهم))

العاملة : هذا .. هذا .. فيه رجال..

- الامن : انت رجال؟؟
- عباس : منهو قالك انا رجال .. انا حرمة اب عن جد .. وفوق راسي ريشه بعد..
- الامن : الحين نتأكد ((يرفع ويكشف البطولة عن وجه عباس))
- خلف : (بتصنع) ويه .. ويه .. ريال ؟؟! .. ياكبرها عند الله .. وطول هالفترة غاشنا واحنا واعليه مهيب حاسين..
- انت .. ماعندك نخوة ..
- عباس : (بندم وبكائيه) لا نخوة ماعندي.. كان واحد في عايلتنا قبل يبي يصير نخوة بس سقط في الانتخابات وما صار نخوه
- خلف : (يصرخ فيه بتصنع وقهر) انت .. انت ماعندك خوات.
- عباس : (بندم) امبلى عندي خوات واحد .. متزوج والحين هو حامل ..
- عثمان : (يتقدم بغضب نحو عباس ويلطمه على وجهه) ياخاين .. احنا حريم وفاكرينك حرمة.. خليتنا ننكشف قدامك .. ونهشت اعراضنا .. يافضيحتي..
- عباس : (بقهر) لا حبيبي .. لا تسون روحكم حريمات شريفات .. انا مهيب بروحي ريال.. انتوا بعد حريمات مثلي .. (الرجل الامن) انا ما اكذب عليكم .. تبي تتأكد شيل بطولاتهم وشوف شنب ماله .. كل واحد شنبه عود..
- ((رجل الامن يرفع البطولة عن وجه عثمان وخلف))
- عثمان : ها .. شفت .. شفت انا ماعندي شنب ..
- العجوز : يابنات .. القاعة كلها ربايل .. تستروا يابنات .. اشردوا روحوا بيوكم.
- ((النساء يسرعن في مغادرة القاعة وهن في حالة فزع ، مبارك في يأس يخلع البشت وهو ينظر الى الريم التي تبكي بقهر))
- عباس : مبارك انت الحين زواجك تكنسل .. يعني البشت ماتبيه
- مبارك : خله يا عباس .. هالبشت متسلقه
- الامن : (يامر اتباعه) خذوهم المكتب .. خل نتصل في الشرطة
- ((رجال الامن القاعة يأخذون الثلاثة ، خلف وعباس وعثمان ويغادرون القاعة التي اصبحت فارغة من الناس ، يبقى فقط الريم ومبارك))
- الريم : شاللي سويته يامبارك .. علشان توفر كم الف جبت ربعك بدال الفرقة .. كم وفرت .. الفين .. عشرة .. عشرين ..

مبارك : (باحراج) الريم .. انا .. انا ..

الريم : (تقاطعه) حرام عليك يا مبارك.. خربت عرسنا .. خربت اليوم اللي تميت طول عمري احلم فيه .. خربت اجمل يوم في حياة اي بنت..

مبارك : (مدافعا عن نفسه بقهر) لا يا الريم .. مهب انا اللي خربت اجمل يوم في حياة اي بنت .. مهب انا اللي خربت احلامكم ..

الريم : لا تقول شي .. مبارك انت حطمتني .. قهرتني .. خلاص مافي شي يقال

مبارك : (بواجهها بانفعال وقهر) لا يا الريم .. في اشياء وايد بقولها .. ما قدرت اقولها خايف لاتزعلين .. خايف الناس يعايروني .. بس الحين لازم اقول لج وحق ابوج وحق كل الناس .. ما نبي نعيش حياة مخربطة .. كل شي في حياتنا صاير خربطيشن .. احنا شعب غني ومترف لكن فقراء .. مهب فقراء فلوس .. فقراء شبع .. واغنياء طمع وجشع .. فقراء قيم واخلاق .. واغنياء مظاهر كذابة .. احنا في طفرة كل يوم تزيدينا عبودية .. عبودية للمظاهر .. ابي اسوي مثل الناس .. الناس مهب احسن مني .. مهب بس في الاعراس حتى في العزا صرنا نتباهى بالخيم والكراسي والاكل .. نبي نعيش في مجتمع صالح .. والناس في المجتمع يحترمونا على قد بيزاتك .. صرنا عبيد .. اشمعنى فلان وفلان وفلانه .. كلمة ارهنتنا وسوتنا عبيد .. صارت قيمتك .. راتبك .. رصيدك .. سيارتك .. بيتك .. شنتنج اللي تشيلينها في ايديج .. المكان اللي تسافرينه .. الدرجة اللي تركبينها .. الخاتم .. الساعة اللي تلبسينهم .. هذي قيمتنا .. ومحد يقيمك .. على صلاتك .. سلوكك .. اخلاقك .. فكرك .. علمك .. كل هذي القيم اتضيع قدام قرشك واشقد عندك ..

(مبارك يصمت للحظات و يجلس او يقف مهموما في المقدمة دون ان ينظر الى الريم التي تخلع طرحتها وترميها على الارض ثم بخطوات بطيئة تغادر بصمت وحزن)

مبارك : (يتابع بحزن) واذا تمينا جذبه بنورث عيالنا هالعبودية وبنزهنهم للبنوك والسلفيات.. تدرين يا الريم .. العصافير .. ماتبني اعشاش لها ولا حق عيالها في الاقفاص علشان ماتعود نفسها ولا تعود عيالها على العبودية وانا ما ابي عيالي يورثون عبوديتي .. الريم الريم .. انتي طالق

((مبارك دون ان ينظر الى مكان الريم الفارغ او يعرف انها غادرت يغادر المسرح ، يظلم المسرح تدريجي وتبقى بقعة ضوء على طرحة العروس حتى تختفي مع الاظلام الكلي))

النهاية